

بِسْمِ اللَّهِ الرَّحْمَنِ الرَّحِيمِ

БАГРИЕНГЛИК КАТТА БОЙЛИГИМИЗ

“Салаф” сўзи арабчада “аввал яшаб ўтганлар” маъносини билдиради. Саҳобий, тобеин ва табаа тобеинлар «солиҳ салафлар», яъни, «солиҳ аждодлар» деб айтилади. Улардан кейинги даврларда яшаган мусулмонларга нисбатан «салаф» ёки «салафий»лар сўзи қўлланмайди.

Аммо бугун «солиҳ салафларга эргашиш» тоғасини ниқоб қилиб олган бузгунчи оқимлар пайдо бўлди. Улар мусулмонларни илк Ислом даврига кайтаришни тарғиб қилувчи мутаассиблардир. Бу фирмаларнинг асл мақсадлари жамиятни бўлиб ташлаш, миллатлараро, динлараро душманлик уругини сочишdir. Улардан бири 1998 йили ташкил топган «Яхудий ва салбчиларга қарши курашиб халқаро Ислом фронти» тузилмасидир. Унга бирлашганлар ўтган йиллар давомида Индонезия, Кения, Танзания, АҚШ, Ироил, Ҳиндистон каби бир қанча мамлакатларда қўпорувчилик ишларини амалга оширишди. Бунинг оқибатида қанчадан-қанча одам курбон бўлди.

Уларнинг даъволарига кўра, милодий йил тақвимига амал қилиш, бошқа дин вакилларининг байрамлари, маданий тадбирларида қатнашиш, уларнинг кийимларини кийиш ҳам гўё имонсизлик ҳисобланади.



Миллатлар тинч-тотувлигига хавф соладиган, турли низоларга замин яратадиган даъватлар динимизнинг асл моҳиятига бутунлай тескари. Чунки Исломда бошқа дин вакилларининг ҳаёти, шаъни, ор-номуси ва ҳақ-ҳукуқлари ҳам қадрланади.

Куръони карим оятлари ва ҳадиси шарифларда бошқа дин вакилларига инсонийлик юзасидан яхши ва чиройли муоммада бўлиш, умуман, барча инсонлар билан ўзаро яхши муносабат, бағриенглик тарғиб қилинган.

«Дин тўғрисида сизлар билан уришмаган ва сизларни ўз юрtingиздан (ҳайдаб) чиқармаган кимсаларга нисбатан яхшилик қилишингиз ва уларга адолатли бўлишингиздан Аллоҳ сизларни қайтармас. Албатта, Аллоҳ адолатли кишиларни севар» (Мумтаҳана, 8).

И мом Абу Довуд ривоят қилган ҳадисда Пайғамбаримиз (алайҳиссалом): «Ким бирор-бир аҳдлашган бошқа дин вакилига зулм қилса, унинг ҳақини поймол этса, тоқати етмайдиган нарсага мажбур қилса ёки розилигисиз бирор нарсасини олса, қиёматда мен ўша одамнинг хусуматчиси бўламан», деб огоҳлантирганлар.

Расулуллоҳ (соллаллоҳу алайҳи ва саллам) хузурларига келган бошқа дин вакилларини яхши кутиб олиб, иззат-икром кўрсатганлар.

Жамият тараққиёти ва халқ фаровонлигига миллатлараро ва динлараро тотувлик, тинчлик-осойишталиктининг аҳамияти катта. Диёrimизда турли динларга эътиқод қилувчи бир юз ўттиздан ортиқ миллат ва элат вакиллари ўртасидаги ўзаро ҳурмат, ишонч, аҳил-иноқлик улуғ неъмат эканини унутмайлик.

Жаҳонгир МЕЛИҚЎЗИЕВ,
Toшкент Ислом университети илмий ходими

ХЕЧ БИР НАРСА МАХФИЙ ЭМАС

إِنَّ اللَّهَ لَا يَخْفِي عَلَيْهِ شَيْءٌ فِي الْأَرْضِ وَلَا فِي السَّمَاوَاتِ

“На Ерда ва на осмонда бирор нарса Аллоҳга махфий (номаълум) эмасдир” (Оли Имрон, 5).

إِنْ رَبَّكَ لَيَالِمُ صَادِ

“Раббингиз (барча нарсани) кузатиб турувчиидир” (Фажр, 14).

يَعْلَمُ مَا يَلْجُ فِي الْأَرْضِ وَمَا تَخْرُجُ مِنْهَا وَمَا يَنْزِلُ مِنَ السَّمَاوَاتِ وَمَا يَعْرُجُ فِيهَا وَهُوَ مَعَكُمْ أَئِنْ مَا كُتُبْتُمْ وَاللَّهُ بِمَا تَعْمَلُونَ بَصِيرٌ

...У ерга кирадиган нарсаларни ҳам, ундан чиқадиган нарсаларни ҳам, осмондан тушадиган нарсаларни ҳам, унга (осмонга) қўтариладиган нарсаларни ҳам билади. Сизлар қаерда бўлсаларингиз, У сизлар билан биргадир. Аллоҳ қилаётган (барча) амалларингизни кўриб турувчиидир (Ҳадид, 4).

Ҳазрат Абу Зарва Муозиби Жабалдан (Аллоҳ улардан рози бўлсин) ривоят қилинишича, Жаноби Расулulloҳ (соллаллоҳу алайҳи ва саллам): “Қаерда бўлсангиз ҳам Аллоҳ таолодан қўрқинг. Ёмонликдан сўнг яхшилик қилинг, уни ювиб кетади ва одамларга яхши хулқ билан муомала қилинг”, дедилар (Имом Термизий).

Ҳазрат Анас (розийаллоҳу анҳу) айтадилар: “Сизлар баъзи (хато) амалларни қилдай (енгил) ҳисоблаб қиляпсиз. Биз Сайиди Олам (алайҳиссалом) замонларида уишларни ҳалокатга боис амаллардан санаардик” (Имом Бухорий ривояти).

«HIDOVAT»

Ойлик диний-маърифий,
илмий-адабий нашр

Муассис

Ўзбекистон мусулмонлари идораси

Бош мухаррир

Нуруллоҳ МУҲАММАД РАУФХОН

Таҳир хайъати

Усмонхон АЛИМОВ
Абдулазиз МАНСУР
Абдураззок ЮНУС
Ортиқбек ЙОСУПОВ
Анвар ТУРСУН
Аҳад ҲАСАНОВ
Зоҳиджон ИСЛОМОВ
Абдулҳамид ТУРСУН
Хайдархон ЙУЛДОШХЎЖАЕВ
Баҳодир КАРИМОВ
Эркин МАЛИК
Муҳаммад Шариф ЖУМАН
Исомиддин ОЛИМОВ
Абдул Жалил ХЎЖАМ
(Бош мухаррир ўринбосари)
Муҳтарама УЛУФОВА
(Маъсул котиб)
Аҳмад МУҲАММАД

Муқова
«Voris Design» маркази билан
ҳамкорликда тайёрланди.

Бадиий мухаррир
Хайруллоҳ ҚУДРАТУЛЛОҲ ўғли

Саҳифаловчи
Баҳром ИКРОМОВ

Матнни
Рахима КАРИМЖОН қизи
терди.

Манзилимиз:

100002 Тошкент шаҳри
Зарқайнар 18-берк кўчча 47а-үй;
Тел: 240-08-23, 227-34-30.
Интернет сайтимиз: www.hidoyat.uz
Интернет почтамиз: hidoyat_jurnali@mail.ru
Ўзбекистон Республикаси Матбуот ва
ахборот агентлигига рўйхатга олинган.
Гувоҳнома рақами 0177.

Босишга 2011 йил 3 июнда руҳсат берилди.
Босмахонага 2011 йил 3 июнда топширилди.
Қоғоз бичими 60x841/8. Адади 43.500 нусха.
1673-сон буюртма. «Sharq» нашриёт-матбаа
аксиядорлик компаниясида босилди.

Кўлёзмалар қайтарилмайди.
Муаллифлар фикри таҳририят нуқтаи назаридан
фарқ қилиши мумкин. Келтирилган иқтибос ва
ракамлар учун муаллиф масъул. Ҳат юборилгани
да исмлар тўлиқ, манзил аниқ ёзилсин. Мақолалар
кўчириб босилса ёки иқтибос олинса, «Ҳидоят»дан
олингани кўрсатилиши шарт.

МУНДАРИЖА

| | |
|---|----|
| Бугуннинг гани | |
| Жаҳонгир МЕЛИҚЎЗИЕВ | |
| Бағрикенглик катта бойлигимиз | 1 |
| Таянч нуқта | |
| Хеч бир нарса маҳфий эмас | 2 |
| Яхшиликка чакириш | |
| Хорунхон АЮБХОНОВ | |
| Кариси бор уй | 5 |
| Мустақилликнинг 20 йиллиги | |
| Зафар ТУРСУНОВ | |
| Ҳаж: кечка ва бугун | 6 |
| Таддіб | |
| Шоҳида АБДУЛЛАЕВА | |
| Иқтидорлilar тақдирланди | 7 |
| Илм масканларида | |
| Даврон АБДУРАҲИМОВ | |
| Мехмонларимиз | 8 |
| Оллоҳшукур ПОШШОЗОДА | |
| Бу юртда қўп нарса кўрдим | 9 |
| Мазҳабимизни ўрганамиз | |
| Отабек МУҲАММАДИЕВ | |
| Муҳаммад ибн Абдулҳамид Усмандий | 10 |
| Ибратли ҳикоялар | |
| Дилафуз САЛОҲИДДИН кизи | |
| Ўргатиб бўлмайдиган илм | 11 |
| Аёлларга хос масала | |
| Идда нима? | 13 |
| Олисларга саёҳат | |
| Орифжон МАДВАЛИЕВ | |
| Малави Республикаси | 14 |
| Фиқҳ | |
| Нозим ИМИНЖОНОВ | |
| Фатво бериш масъулияти | 16 |
| Тарих | |
| Дарбанддаги «Жума» масжиди | 18 |
| Табаррук зиёратгоҳлар | |
| Шоабдумалик ота мажмуаси | 19 |
| Хабарлар | |
| Ислом ва олам | 20 |
| Бугуннинг гани | |
| Икромжон МАРДОНОВ | |
| Роғун ГЭСи – минтақа ҳалқлари | |
| келажагига таҳдид | 22 |
| Яхшиликка чакириш | |
| Аскад МУХТОР | |
| Тундаликлар | 25 |
| Шеърият | |
| Мирза ҚАЙНАРОВ | |
| Умид тарқ этмасин дилни | 26 |
| Ўқтам ЙЎЛДОШ | |
| Мехри булоқ эди | 27 |
| Халқона ўғитлар | |
| Момоларимиз айтади | 27 |
| Бугуннинг гани | |
| Муҳаммад Сиддик | |
| Юрак кўри билан | 28 |
| Китоблар тақдимоти | 29 |
| Мактубларда манзаралар | |
| Холида она ИСМОИЛОВА | |
| Рухимда покланиши хис қилдим | 29 |
| Тарбия | |
| Муҳтарама УЛУҒ | |
| «...Индумасанг, ўзи келар» | 31 |
| Фойдали маслаҳатлар | |
| Мойчечак гули | 32 |

Мустақилликнинг 20 йиллиги

Абдулҳай ТУРСУНОВ

ҚАДРИЯТЛАРИ ҚАДРЛАНГАН ЎРТ

4

Истиқлол шарофати билан Қуръони каримнинг ўзбек тилига бир неча бор ўгирилиши, кўзи ожизлар учун Брайл ёзуvida нашр қилиниши кимни қувонтирмайди?

Ёмонликдан қайтарииш

Иzzатуллоҳ ТУРҒУНОВ

БИР ДУО ШАРҲИ

Қўшнини хурмат қилиб, ҳақини адо этиш, касал бўлса хабар олиб, зориқса ёрдам бериш, хато ва камчиликларини яшириб, яхши фазилатларидан гапириш, вафот этса мусибатига ҳамдард бўлиб, дағн ишларига қатнашиш, уй-жой ва ер-сув масалаларида маслаҳат қилиш, иморатини униқидан баланд қуриб, ҳавони ва қуёш нурини тўсмаслик мўминнинг бурчи хисобланади.

Мерос

Алишер Навоий

ҚАНОАТ БОЙЛИКДИР

Қаноат – бир чашмадир, олган билан унинг суви қуrimайди; у бир хазинадир, ундан бойлик сочишган билан камаймайди; у бир экинзор, уруғи иззат ва шавкат ҳосилини беради; у бир дараҳтдир, унда қарам бўлмаслик ва хурмат меваси бор.

Аёллар саҳифаси

Зебунисо ҲУСАЙН

БОЛАНГИЗНИ СОГИНАСИЗ...

Жонимнинг бир парчасига тўймай қарайман – пишшиллабгина ухлайди. Масъум юзига боқиб ором оламан. Ҳали гуноҳлар қорайтиргмаган жаннатий чехрасидан кўз ололмайман. Қўзим тегмасин... Кўнглимдан дуолар отилиб чиқади: Болажоним! Бунчалар покизза яратилгансан! Аллоҳим сени йиллар оралиғидан тоза ва гуноҳсиз олиб ўтсин...

30

ҚАДРИЯТЛАРИ ҚАДРЛАНГАН ЎОРТ

Юртбошимизнинг “Ўзбекистон Республикаси давлат мустақилликининг йигирма йиллигини нишонлашга тайёргарлик кўриш ва уни ўтказиш тўғрисида” ги қарори биз наманганликларни ҳам жуда илҳомлантириди. Қайси соҳада бўлишидан қатъи назар, қарорда белгиланган мақсад, вазифаларни тўла бажаришга ҳар биримиз ҳисса кўшишимиз керак.

Ўзбекистон Республикаси Конституциясининг 31-моддасида “Ҳамма учун виждан эркинлиги кафолатланади”, деб ёзилган. Қолаверса, “Виждан эркинлиги ва диний ташкилотлар тўғрисида” ги қонуннинг қабул қилиниши яқин-яқинларда ҳам ота-онаси жанозасини ўтказгани учун ҳам жазоланганд, беш вақт намозни яширинча ўқиган, рўза тутишдан чўчиб, юрагини ҳовучлаб юрган фуқароларимиз учун чинакам байрам эмасми?

1991 йилгача Наманган вилоятидан атиги 16 нафар киши ҳажга борган бўлса, бугун уларнинг сони 13 минг 129 нафарга етди. Вилоятимиздан 2003 йили борйуғи 160 нафар киши умра зиёратига борган эди, 2010 йили бу кўрсаткич 880 нафардан ошди.

Бугун Республикализнинг бир нечта вилоятларида диний билимларни ўргатишига ихтиослаштирилган ўқув юртлари ишлаб турибди. Жумладан, Наманган шаҳридаги “Мулла Қирғиз” Ислом ўрта маҳсус билим юрти ҳам диний ташкилотларга малакали мутахассислар етказиб бермоқда.

Истиқлол шарофати билан Куръони каримнинг ўзбек тилига бир неча бор ўтирилиши, кўзи ожизлар учун Брайл ёзувида нашр қилиниши кимни қувонтирмайди?

Имом Бухорий ва Имом Термизийнинг “Ҳадислар”


тўплами ҳамда Бурҳониддин Марғинонийнинг “Ҳидоя” асари она тилимизда чоп этилиб, халқимизнинг маънавий мулкига айланди. Шунингдек, Баҳоуддин Нақшбанд, Имом Замахшарий, Фарғоний, Хоразмий, Беруний, Алоуддин Косоний, Имом Мотуридий, Бурҳониддин Марғиноний, Ҳаким Термизий, Абу Лайс Самарқандий, Нажмиддин Кубро, Абдухолиқ Ғиждувоний, Хўжа Аҳрор Валий, Абу Бақр Наршахий, Амир Кулол, Ориф Ревгари, Али Рошидоний, Бобои Самосий, Махдуми Аъзамларнинг бебаҳо асарларини ёшларимиз бугун ихлос билан ўқимоқда.

Номлари юқорида зикр этилган буюк боболаримизнинг асл сиймолари, дунё тамаддунига қўшган улкан ҳиссалари советлар даврида атайн яширилган эди.

Бир сўз билан айтганда, истиқлол йиллари улуғ аждодларимиздан бирортасининг қабри, дахмаси эътибордан четда қолмади. Шулар қаторида Наманганда яшаб ўтган алломаю фузалолар киёматгача қўним топган жойлар ҳам обод қилинди.

Диёrimizдаги қадими масжидлар, мадрасалар, мажмуалар хукуматимиз қарори билан Ўзбекистон мусулмонлари идораси тасарруfigа берилди. Бундан вилоятимиз ахли ҳам кенг фойдаланмоқда.





1999 йили мухтарам Юртбушимиznинг “Аллоҳ қалбимизда, юрагимизда” рисолаларининг нашр этилиши, “Тошкент ислом университетини ташкил этиш тўғрисида”ги Фармонлари мухим ва унтилмас тарихий воқеа бўлди.

“Хидоят”, “Имом ал-Бухори сабоқлари” журнали, “Ислом нури” газетаси, “Мовароуннаҳр”, “Мерос”, “Маънавият” нашриётлари, “Тошкент ислом университети” нашриёт-матбаа бирлашмаси, Тошкент ислом университети “Зиё” студиясининг динимизни, маънавий-маърифий меросимизни келажак авлодларга етказишида хизматлари катта.

Куръони карим ва ҳадис илмининг асасларини, ҳадисшунослик мактабининг илмий-маънавий асосларини теран ўрганиш, кенг тарғиб қилиш, имом-хатиблар малакасини ошириш учун Президентимизнинг “Имом Бухорий халқаро марказини ташкил этиш чора-тадбирлари тўғрисида”ги қарори қабул қилинди. Шу кунгача вилоятимиз имом-хатибларининг етмиш нафари бу илм даргоҳида малака ошириб қайтди.

Мухтарам Президентимизнинг Фармонлари билан Қурбон ва Рамазон ҳайитлари дам олиш куни сифатида байрамона нишонланмоқда, тўққизинчи май – Хотира ва қадрлаш куни нуронийларимизни қўллаб-кувватлаш санасига айланди. Бир сўз билан айтсан, қадриятлари қадрланган юртга эга бўлдик. Унинг яна ҳам гуллаб-яшнаши учун ҳар биримиз масъулмиз.

Абдулҳай ТУРСУНОВ,

Ўзбекистон мусулмонлари идорасининг
Наманган вилоятидаги вакили

ҚАРИСИ БОР УЙ...

Атрофимизда ҳаёт синовларида тобланиб, бошидан яхши-ёмон кунларни кўп ўтказган ёши улуғ кишиларнинг борлиги биз учун улуғ неъматdir. Қарияларни хурматлашга Ислом динида алоҳида эътибор берилган.

“Раббин факат

Унинг ўзигагина ибодат

қилишни ва ота-онага яхшилик қилишни амр этди. Агар ҳузурингда уларнинг бирлари ёки икковлари ҳам кексаликка етсалар, бас, уларга “уф” дема, уларга озор берма ва яхши сўз айт” (Исро, 23).

Расулуллоҳ (соллаллоҳу алайҳи ва саллам): “Агар орангизда мункиллаган қариялар, ўтлаб юрган чорва ҳайвонлари ва эмизикли чақалоқлар бўлмаганида, балолар бошингизга селдай оқиб келарди”, деб марҳамат қилганлар.

Яна бир ҳадисда “Кичикларга раҳм-шафқатда, катталарга хурмат-иззатда бўлмаган киши биздан эмасdir”, дейилган.

Аллоҳ таоло бизларга қариялар сабаб шунча кўп марҳамат кўрсатар экан, ўз навбатида бизлар ҳам уларнинг хурматини жойига қўйиб, авайлаб-асрашимиз керак.

Қайси хонадонда ота-она ёки улардан бирлари ҳаёт бўлса, ўша оиланинг фариштаси бор, бағри бутун бўлади. Бува ва бувилар ёшларнинг, айниқса, набираларининг таълим-тарбияси, ахлоқ-одобини назорат қилиб, ҳаётий тажрибалари асосида тўғри йўл кўрсатади.

Қайтар дунё, дейдилар. Ҳаётда ота-онанинг хизматини қилиб, уларни рози қилган кишиларнинг яхшиликлари болаларидан қайтганини кўп бор кўрганмиз. Аксинча, ота-онаси кўнглини оғритиб, норози қилиб, мақсадга етолмаганларни ҳам биламиз.

Ҳар бир ота-она қариганида фарзандлари ардоғида бўлишни истайди. Лекин бунинг учун истакнинг ўзи камлик қиларкан. Катталар болаларни ёшлигидан кексаларни хурмат қилишга ўргатиши, ўзлари ҳам уларга ибрат ва намуна бўлиб, ёши улуғ кишилар ҳолидан хабар олиб туришлари зарур.

Хоруинон АЮБХОНОВ,
мечнат фахрийи



ҲАЖ: КЕЧА ВА БУГУН

Юртдошларимиз йилдан-йилга ҳаж ибодатларини эмин-эркин адо этиб келяптилар. Собиқ совет тузуми даврида кутлуғ тупроқларга бориб, Ислом динининг бешинчи устуни – ҳаж амалини ўташ ота-боболаримизнинг армони эди. Ўша пайтда Ўрга Осиё ва Қозоғистон мусулмонлари диний бошқармасидан йилига атиги тўрт-беш нафар киши ҳажга борар эди. Бунинг устига, Тошкент – Дамашқ – Жидда йўналишида ўттиз беш-қирк беш кун маşaқатли йўл босилар эди.

Мустақилликка эришганимиздан кейин ҳаж ибодатларини эмин-эркин адо этиш учун кулай шароитлар яратила бошланди. 1991 йили ҳажга 500 нафар юртдошимиз борган бўлса, 1997 йилга келиб бусон 3500 нафарга етди. Ўша пайлари Тошкентда Саудия Арабистони Қироллиги эл-



чиҳонаси бўлмагани сабабли, ўзбекистонлик зиёратчиларнинг паспортлари Москва шахрига олиб борилиб, виза олиб келинارди. 1997 йили Тошкентда Саудия Арабистони Қироллиги элчиҳонаси очилиб, виза олиш осонлашди.

Илгарилари самолётларнинг чarter рейслари жад-

вали олдиндан аниқ ишлаб чиқилмас эди. Саудиядаги зиёратчилар жойлашадиган меҳмонхоналар улар боришиндан икки-уч кун олдин белгиланарди. Ишчи гуруҳи бешолти кишидан, шифокорлар эса бир-икки кишидан ташкил топарди. Ҳаж амаллари бажариладиган жойлар – Мино, Муздалифа ва Арафотда ҳожиларимиз учун муайян жойлар ажратилмаган, ички улов хизмати такомиллашмаган эди. Бундан ташқари, у ердаги ширкат харажатлари чет эл пулига кўпайтирилмасдан, тўловлар нақд пул билан амалга ошириларди. Зиёратчиларимиз бир неча кичик-кичик меҳмонхоналарда туради. Шароитлар чекланган, шу хоналарда ётилар, шу ерда овқатланилар эди. Хуллас, катта-кичик муаммолар бор эди.

Бундай камчиликларни кетма-кет бартараф қилина бошланди.

2005 йилдан бўён зиёратчиларимиз замонавий мебеллар билан жиҳозланган шинам хоналарда уч-тўрт киши турадиган бўлди.

2010 йилги ҳаж мавсуми республикамиз Президенти Фармонига мувофиқ тузилган ҳаж ва умра тадбирларини ташкил этиш масалалари бўйича Жамоатчилик кенгашининг қарорлари ва тавсиялари асосида амалга оширилди.

Ҳар йили 5000 нафардан ошиқ юртдошимиз ҳажга бормоқда, ҳаво кемаларимиз ҳаж мавсумида тўғридан-тўғри Мадинага қўнадиган бўлди.

Яратилган қулай шароитлардан яна бири вилоятлардаги ҳожиларимиз ўзларига яқин бўлган халқаро аэропортдан тўғридан-тўғри Саудия Арабистонига жўнаб кетаётгандаридир. Жумладан, Қорақалпоғистон ва Хоразм вилояти зиёратчилари Ур-



ганчдан, Сурхондарё вилояти зиёратчилари Термиздан, Қашқадарё, Навоий ва Бухоро вилоятлари зиёратчилари Бухородан, Андижон, Намангандан Фарғона вилоятлари зиёратчилари Намангандан учиб кетишияпти. 2011 йилдан бошлаб Самарқанд халқаро аэропортидан ҳам сафарга жўнатиш йўлга кўйилди.

Макка ва Мадина шахарларида миллионлаб зиёратчилар орасида ҳожилар адашиб қолмаслиги учун ўзбекистонлик зиёратчилар Ўзбекистон байробиги рамзи туширилган кийим ва сумкалар, ибодат арконлари ҳақидаги видеотасма ҳамда ўқув кўлланмалари билан таъминланишяпти.

Ўтган йиллардаги тажрибадан келиб чиқкан холда, жорий йилда ҳам мутасадди ташкилот ва идоралар ҳамкорлигига араб тилини яхши биладиган ўттиз кишидан иборат ишчи



гурухи, ўттиз нафар малакали шифокор, ўн нафар моҳир ошпаз ўзбекистонлик зиёратчиларга юрак кўри билан хизмат қиласди.

Тайёргарлик ишлари учун ишчи гурухи аъзолари билан биргаликда Саудия Арабистони Жидда шахридаги Ўзбекистон Республикаси Бош консуллиги таркибида Ҳаж ва умра ишлари билан шуғулланувчи алоҳида атташе ташкил этилиши айни муддао бўлди.

Зиёратчиларга ҳаж мавсумидан ташқари умра мавсумида ҳам хизмат кўрсатиш учун кенг имкониятлар яратилди. 1993 йили умра сафарига 200 нафар зиёратчи борган бўлса, энди ҳар йили 6000 нафардан кўп ватандошларимиз умра ибодатини адо этишмоқда. Кузги умра мавсуми йил сайнин ёз фаслига кириб келаётгани ҳамда зиёратчилар талаби инобатга олиниб, 2009 йилдан умра сафари баҳорги ва кузги мавсумларда амалга оширилмоқда.

Ҳожиларимиз шарт-шароитлардан мамнун бўлиб, она-юртимизга тинчлик-тотувлик, фаравонлик, кут-барака сўраб дуолар қилишмоқда. Илоҳим, уларнинг зиёратлари ҳам, дуолари ҳам қабул бўлсин.

Зафар ТУРСУНОВ,
ЎМИ Халқаро алоқалар
бўлими мудири
вазифасини бажарувчи

ИҚТИДОРЛИЛАР ТАҚДИРЛАНДИ

Жорий йилнинг 1 май куни “Жўйбори Калон” Ислом ўрта махсус билим юртида “Хар ким ҳар куни савоб иш қилиши керак” мавзуида маънавий-маърифий тадбир бўлиб ўтди. Тадбирнинг биринчи қисмида Ўзбекистон мусулмонлари идораси раиси ўринбосари Абдулазиз Мансуров, таълим бўлими бошлиғи Жалолиддин Нуриддинов, “Баҳоуддин Нақшбанд” ёдгорлик мажмуаси маркази илмий ходими Ко-милжон Раҳимовнинг маърузалари тингланди.




Иккинчи қисмда эса Ўзбекистон мусулмонлари идораси тасарруфидаги олий ва ўрта махсус билим юртлари иқтидорли талабаларига грант маблағлари топширилди.

Ўнта таълим мусасасасига диний таълимни ривожлантириш дастури доирасида моддий ва техник ёрдам берилди. Шунингдек, ушбу таълим мусасасаларидағи эллик нафар иқтидорли талабаларга пуллик грантлар ажратилди. Диплом ва эсадалик совғалари топширилди.

Шоҳида АБДУЛЛАЕВА,

“Жўйбори Калон” Ислом ўрта махсус
билим юрти мудираси



МЕХМОНЛАРИМИЗ

Шу йилнинг 18 май куни Мадина Ислом университети ректори доктор Мухаммад бин Али Фараж ал-Уқла ат-Тамимий бошчилигидаги меҳмонлар Ҳазрати Имом мажмуасига келишди.

Меҳмонлар Ҳазрати Имом масжидида бўлиб, сўнг Диний идора кутубхонасида сақланаётган VII асрга оид “Ҳазрати Усмон мусҳафи” ва бошқа нодир қўлёзмаларни кўришди. Улар Бароқхон мадрасаси-

ва, энг муҳими, институт дипломи давлат стандартига тенглаштирилгани ҳақида меҳмонларга гапириб берди.

Мадина Ислом университети ректори доктор Мухаммад ибн Али Фараж ал-Уқла ат-Тамимий меҳмондўстлик учун Ўзбекистон мусулмонлари идораси раҳбариятига миннатдорлик билдириб, Ўзбекистон ҳукуматининг таълимга, хусусан, диний таълимга эътибори, талабаларига яратилган имкониятлар ҳақида ижобий фикрлар билдириди.

Учрашув якунида меҳмонларга эсадалик совғалари топширилди. Меҳмонлар ўқитувчи ва талabalар билан бирга суратга тушишли.

Шундан кейин меҳмонлар Самарқанд ва Бухоро шаҳарлари саёҳатига жўнаб кетдилар.

* * *

19 май куни Кавказ мусулмонлари идораси раиси, Кавказ халқлари олий диний кенгаши раиси, шайхулислом Оллоҳшукур Пошшозода бошчилигидаги меҳмонлар Тошкент ислом институтига келишди. Уларни Ўзбекистон мусулмонлари идораси раиси, муфтий Усмонхон Алимов, институт ректори, ўқитувчи ва талabalар кутиб олишиди.

Дастлаб меҳмонлар институт ҳаёти билан танишиши-

ди. Сўнгра Ўзбекистон мусулмонлар идораси раиси, муфтий Усмонхон Алимов Озарбайжон телевидение-сига, Кавказ мусулмонлари идораси раиси, шайхулислом Оллоҳшукур Пошшозода Ўзбекистон телерадио-



компаниясига интервью бернишди.

Сўнг меҳмонлар институт ҳовлисида талабалар билан учрашув учун тайёрланган жойга ташриф буюришди. Тадбирда шайхулислом Оллоҳшукур Пошшозода институтда ўзи ўқиган пайтдаги хотираларни гапириб берди ва бугунги ўзгаришларга юксак баҳо берди. Меҳмонлардан Шимолий Кавказ мусулмонлари мувофиқлаштирувчи маркази раиси, Қорачой-Черкесия муфтийи Исмоил Бердиев, Чеченистон мусулмонлари идораси раиси, муфтий Султон Мирзаев ҳам сўзга чиқиб, Совет иттифоқи даврида диний таълимга бўлган муносабат, бугунги кунда талabalарга яратилган шаротлар ҳақида гапиришди. Илиқ муносабат, самимий



да миллий касб-хунар на- муналари билан ҳам танишишли.

Меҳмонлар Тошкент Ислом институтида масжид, янги ташкил қилинган информатика, “Талabalар кенгashi” хоналари, ахборотресурс марказини кўришди. Дарс жараёнини кўздан кечиришди. Мажлислар залида ўқитувчи ва талabalар билан учрашишли. Ректор институт тарихи ва бугуни, таълим-тарбия ишлари самарасини ошириш учун яратилаётган шарт-шароитлар



дўстлик учун миннатдорлик билдиришди.

Ўзбекистон мусулмонлари идораси раиси, муфтий Усмонхон Алимов шайхулислом Оллоҳшукур Пошшозодага талабалик даври ва Ўзбекистонга аввал қилинган сафарлар расми туширилган фотоалбомни, Шимолий Кавказ мусулмонлари мувофиқлаштирувчи маркази раиси, Корачой-Черкесия муфтийи Исмоил Бердиевга Тошкент Ислом институтини битиргани ҳақидаги дипломни топширди. Шунингдек, меҳмонларга “Мовароуннахр” нашриётида чоп этилаётган китоблар, “Хидоят” журнали ва “Ислом нури” газеталари ҳам тақдим этилди.

Кавказ мусулмонлари идораси раиси, Кавказ халқлари олий диний кенгаши раиси, шайхулислом Оллоҳшукур Пошшозода самимий меҳмондўстлик учун миннатдорчилик билдириб, институт талабалирига совға топширди.

Даврон АБДУРАҲИМОВ,
Тошкент Ислом
институти ходими



Шайхулислом Оллоҳшукур Пошшозоданинг талабалар билан сұхбатидан айрим парчалар келтирамиз:

“БУ ЮРТДА КҮП НАРСА ЎРГАНДИМ”

“Мен бу юртда устозларимдан нафақат улар ўқитган китоблардан, балки ҳаёт сабоқларидан ҳам кўп нарса ўргандим. Совет тузуми даврида диний таълим берган устозлар ва таълим олган талабалар назорат ҳамда босим остида бўлишар эди. Мен куни кечак Бухоро ва Самарқанд шаҳарларида бўлиб, “Баҳоуддин Нақшбанд” мажмуаси, “Мир Араб” мадрасаси, “Шоҳи Зинда” ва бошқа бир неча зиёратгоҳларни томоша қилдим. Деярли барча жойлар янгидан таъмирланган. Гўзал ва озода ҳолга келтирилган. Албатта, бу ишлар давлат раҳбарининг инояти ва эътиборидан далолат қиласи. Шуни ишонч билан айтаман, ҳар давлатда ҳам ўз дини ва аждодларига бундай гўзал муносабатда бўлинавермайди. Бундай неъматни қадрлаш зарур.

Мен Ватанига ва динига рағбати бўлган, халқини ва динини ўйладиган икки давлат раҳбарини қўрдим. Юртбoshингиз Ислом Абдуғаниевич Каримов жаноблари шулардан бири ҳисобланади. Биз Ислом Каримов жаноби олийлариининг “Юксак маънавият – енгилмас куч” номли китобларини озарбайжон тилига таржима қилдик, бу китоб юртимиз халқи ва талабалари учун ҳам муҳим манба ҳисобланади.

Бу ўкув масканидан дунё эътироф этган олимлар этишиб чиқди. Бухоро, Самарқанд ва Тошкент ҳамма вақт уламолар юрти бўлиб келган. Иншааллоҳ, келажакда ҳам шундай бўлади.

Бугун Кавказорти юртларининг барча диний уламолари ва раҳнамолари шу ерга тўпланиб келдик. Бунинг сабаби нима деб сўралса, бу юртдаги азизларимиз, устозларимиз ва яқинларимизни кўргани ҳаммамиз йиғилиб шу ерга келдик, деб айтар эдим. Мен Усмонхон Алимов ҳазратларига миннатдорлик билдираман. Мен ўзимни ҳам Озарбайжоннинг, ҳам Ўзбекистоннинг фуқароси, деб ҳисоблайман. Бундан фахрланаман.

Талабалик давримизда институтда яшаш шароити бир мунча қийин эди. Ҳозирги яратилган қулийлардан қувондим. Бу неъматларнинг қадрига етиш керак. Сиз бизнинг келажагимизсиз, диннинг келажаги, эртанги фаровон ҳаёт сизнинг қўлингизда. Мен сизларга муваффақиятлар тилайман...”.



Олимнинг тўлиқ исми Абул Фатҳ Алоуддин Муҳаммад ибн Абдулҳамид ибн Умар ибн Ҳасан ибн Ҳусайн Усмандий-Самарқандийдир. У 1095 йили Самарқандда туғилган.

Ёзма манбаларда аллома туғилган жой номи “Асманд” ёки “Усманд” деб келтирилади. Баъзилар аслида, бужой “Асманд”дир, алломага ҳам “Асмандий” деб нисбат берилган, дейишса, бошқалар қишлоқ номини “Усманд” ёки “Саманд” деб ёзади.

МУҲАММАД ИБН АБДУЛҲАМИД УСМАНДИЙ

Жиззах вилояти Бахмал туманинг маркази Усмат аслида “Усманд” бўлган, вақт ўтиши билан одамлар тилида “Усмат”га айланган деган фикрлар ҳам бор. Қўргонтепага кираверишдаги “Усмат ота” зиёратгоҳини айримлар аллома Муҳаммад ибн Абдулҳамид Усмандий-Самарқандий номи билан боғлайди.

Алломанинг отаси Абдулҳамид Усмандий етук олим, сўзга бой моҳир ваъз айтувчи бўлган.

Олимнинг ҳаёти ва ижоди ҳақидаги маълумотлар жуда кам. Баъзи манбаларда унинг 1157 йили, олтмиш тўрт ёшида Бухорда вафот этгани қайд қилинади. Абу Саъд Абдулкарим Самъоний ёзишича, Муҳаммад Абдулкарим Шаҳристоний аллома билан Марвда бир неча марта учрашган. У зот Абу Ҳафс Нажмиддин Умар Насафий, Абул Муъян Нашвоний, Алоуддин Самарқандий ва Нуриддин Аҳмад ибн Маҳмуд Собуний каби ийрик олимлар билан бир даврда яшаган. Таниқли олим Қураший ўзининг “Ал-Жавоҳирул музия фи табақотил ҳанафия” (“Ҳанафий уламоларнинг таржи-маи ҳолларидағи ёрқин жавҳарлар”) асарида алломани 1157 йили Шамс ибн Ҳисом ибн Бурҳон билан ҳаж сафаридан бирга Бағдодга қайтди, деб ёзади.

Усмандий фиқҳни устози Ашраф ибн Муҳаммад Алавийдан ўрганган. Ҳадис илмини эса “Садруш шаҳид” деб танилган Ҳусомиддин Умар ибн Абдулазиз ибн Моза Бухорийдан олган.

“Жамолул Ислом” деб таърифланган Абул Музаффар Асъад Каробисий Бурҳониддин Марғинонийнинг ўғли Умар ибн Бурҳониддин Али ибн Абу Бакр Марғиноний каби забардаст олимлар у зотнинг шогирдларидир.

Алоуддин Муҳаммад Усмандий асарларининг ҳаммаси араб тилида ёзилган. “Ҳасрул масоил ва қасруд далоил” (“Муайян масалалар ва қисқа далиллар”)





ЎРГАТИБ БЎЛМАЙДИГАН ИЛМ

асари Нажмиддин Умар Насафийнинг “Ал-Манзума фи илмил хилоф” номли китобига ёзилган шарҳдир. Китобнинг учта қўлёзма нусхаси Истанбулдаги Сулаймония кутубхонасида сақланмоқда. Асарга Имом Суғдий, Абул Мағоҳир Муҳаммад ибн Маҳмуд Судайсий ва бошқа олимлар шарҳ ёзишган.

Усмандийнинг “Тариқатул хилоф фил фиқҳ байнал аимматил аслоф” (“Ўтган алломалар ўртасида фиқҳдаги ихтилоф сабабларий”) асарида фиқҳлар ҳақида баён қилинган. Асарни Муҳаммад Закий Абдул Барр тадқиқ қилган ва 1990 йили Коҳирадаги “Дорут турос” матбаасида нашр этилган. Алломанинг “Базлун назар фил усул” (“Фиқҳ асосларига чуқур назар”) асарини ҳам Муҳаммад Закий Абдул Барр илмий ўрганиб, 1992 йили Коҳирада чоп этган. Алломанинг “Таълиқа фил фиқҳ” (“Фиқҳ илмида изоҳ”) номли асари фиқҳ илмининг фуруъ (тармоқлари) масалаларига бағишиланган. “Ал-Амолий фит тафсир” (“Тафсир илмидан ёзилган масалалар”) асари ёзма манбаларда Қуръони каримга бағишиланган тафсир, деб қайд этлади.

Усмандийнинг “Лубобул қалом” (“Қалом илмининг жавҳари”) асарининг иккита қўлёзма нусхаси бизгача етиб келган. Улардан бири Истанбулдаги Сулаймония кутубхонасидadir. Қадимий нусхалардан бўлган ушбу асар нуқталарсиз настълиқ хатида битилган. Уни хаттот Али ибн Нажмиддин 1303 йили кўчирган. Иккинчи қўлёзма нусхаси хаттот Юсуф ибн Байрамбек 1314 йили настълиқ хатида кўчирган нусхадир. Асар мотуридия эътиқоди ҳақида ёзилган. Аллома ақидада адашган қадарийлар, мұтазилийлар, жабарийлар ва бошқа ботил фирмаларни танқид қилиб, қабр азоби ва савол-жавоби, Сирот кўприги, шафоат, имомат масалаларини кенг баён этган.

Отабек МУҲАММАДИЕВ,
Имом Бухорий ҳалқаро маркази
Ахборот-ресурс маркази бошлиги

Басра шахрида бир киши бор-будини ёлғизгина ўғлининг яхши таълим-тарбия олиши учун сарфлар экан. Ёш ийгит неча йиллар мобайнида номдор илм даргоҳларида энг машҳур устозлардан таълим олибди.

Ниҳоят, бола уйга қайтибди. Кексайиб қолган отаси унга пешвоз чиқибди, ўғлининг кўзларига тикилиб, кўнгли тўлмабди ва:

– Ўғлим, нималарни ўргандинг? – деб сўрабди.

– Отажон, ўргатилиши мумкин бўлган барча нарсани ўргандим, – деб жавоб килибди ўғил.

– Лекин ўғлим, сен ўргатиб бўлмайдиган нарсани ҳам ўргандингми? Бор, ўргатиб бўлмайдиган нарсани ўрганиб кел, – деб ота уни ортига қайтарибди.

Ийгит устозининг ёнига қайтиб, отасининг талабини айтибди. Шунда устози жавоб ўрнида:

– Мана бу тўрт юз қўйни олгин-да, сони то мингтага етгунча тоғларда яша, – дебди.

Ийгит қўйларни олиб тоғлар бағрида чўпонлик қила бошлабди. У ҳаётида биринчи марта сокинликка дуч келибди. Ҳеч сухбатдош тополмай сиқилган вақтларида қўйларга гапирав, улар борлигидан ҳам таскин оладиган бўлибди. Ийгит секин-аста ўзидаги “мен”ни, манманликни, ғуурни унута бошлабди... Бора-бора сокин ва ҳокисор инсонга айланибди. Унда сабрлилик ва донишмандлик белгилари пайдо бўлибди.

Орадан икки йил ўтиб қўйларнинг сони мингтага етгач, у устозининг ёнига қайтиб бориб ҳурмат билан таъзим қилибди. Шунда устози:

– Мана энди ўргатиб бўлмайдиган нарсани ҳам ўргандинг, – дебди.

*Тошкент Ислом институти талабаси
Дилафуз САЛОҲИДДИН қизи
тайёрлади.*

БИР ДУО ШАРҲИ

Ҳазрат Довуд (алайҳиссалом) Бани Исроил қавмига юборилган пайғамбарлардан. Унга “Забур” туширилган. У зот Яратгандан илтижо қилиб, ҳар вақт тўрт нарсадан паноҳ тиларканлар:

“Эй Парвардигор, мени фитна-фасод келтирадиган мол-дунёдан, азоб-уқубатга сабабчи фарзанддан, қарилек келмасидан олдин қаритадиган ёмон хотиндан сақлагин. Яна Сендан кўзлари билан кузатиб, қулоқлари билан эшитиб, яхшилигинги нинг ерга кўмадиган, ёмонлигинги ошкор қиласидиган қўшнидан паноҳ сўрайман”.

Ҳалол меҳнат билан кун кўриш пайғамбарлар суннатидир. Ҳаром, шубҳали йўллар билан топилган мол фитна-фасод қўзғалишига ва банданинг бошига ҳар турли бало-қазолар ёғилишига сабаб бўлади. Бундай бойлик эгалари тириклигида таъяною маломатларга, жазоларга йўлиқса, ўлганидан кейин маҳшаргоҳда халойиқ олдида шарманда бўлади. Қиёмат куни ҳар ким қаердан, қандай йўл орқали мол-дунё топгани ҳақида сўралади. Расулulloҳ (соллаллоҳу алайҳи ва саллам): “Қоринни ҳаром ва шубҳали нарсаларни ейишдан ва ичишдан сақлаш мўминлик аломатидир”, деганлар.

Фарзанд солиҳ, итоатли, ота-онасининг розилигини топиб, элу юрт дуосини олса, илмга, касб-хунарга эга бўлса, ота-онасига бу дунёда ҳам, охиратда ҳам фойда етказади.

Бунинг акси бўлса, меҳнату машаққатлар билан боқиб, не орзу-умидлар билан тарбия қилган ота-онаси бошига жабру жафолар солади.

Ота-оналар ҳар доим фарзандларининг таълим-тарбиясига қайгуриш билан бирга, инсоф, тавфиқ, ҳидоят ҳамда баҳт-саодат тилаб уларнинг ҳақига дуо ҳам қилишлари зарур.

Ёшларнинг маънавий ва маърифий жиҳатдан етук, касб-хунарли, оиласи, ватани, миллати, дини учун фойда келтирадиган қилиб тарбиялаш ота-оналар елкасида-ги вазифаларданdir.

Яна Довуд (алайҳиссалом) дуоларида қарилек келмасидан олдин қаритадиган ёмон хотиндан паноҳ сўралади. Динимиз ҳукмига кўра, эр ва хотин зиммасига бир қанча бурч юклатилади. Баъзилар бу бурчни тўлиқ тушунмайди, натижада можаро ва ажримлар келиб чиқади. Аёл эрига итоатда бўлган хонадонда тинчлик, ҳотиржамлик ҳукм суради. Айрим аёллар эрининг топган-тутганига қаноат қилмайди, тинчтотув ҳаётнинг қадрига етмай ношуқрлик қиласидилар. Пайғамбаримиз (алайҳиссалом) аёлларга қаратади: “Эринг сенинг жаннатинг ё жаҳаннамингдир” деба хитоб қилганлар.

Яна бир ҳадиси шарифларида: “Агар аёл беш вақт намозини ўқиб, Рамазон рўзасини тутса, номусини муҳофаза қилиб, эрига итоат этса, жаннатнинг хоҳлаган эшигидан киради”, деганлар.


Демак, аёлкиши оғир-босиқ бўлиши, арзимаган нарсалардан жанжал чиқармаслиги, никоҳлари бузиладиган даражада талашиб-тортишмаслиги керак.

Қўшнини ҳурмат қилиб, ҳақини адо этиш, касал бўлса хабар олиб, зориқса ёрдам бериш, хато ва камчиликларини яшириб, яхши фазилатларидан гапириш, вафот этса мусибатига ҳамдард бўлиб, дағн ишлари-га қатнашиш, уй-жой ва ер-сув масалаларида маслаҳат қилиш, иморатини унизидан баланд қуриб, ҳавони ва қуёш нурини тўсмаслик мўминнинг бурчи ҳисобланади.

Қўшнилар ҳақидаги оятлардан бутун бир шаҳар ёки қишлоқ аҳди дини, миллати ва эътиқодидан қатъи назар, бир-бирларига қўшнилик ҳукмида экани маълум. Ҳадиси шарифда Пағамбаримиз (алайҳиссалом):

“Ким Аллоҳ таоло ва охират кунига имон келтирган бўлса, қўшнисига озор бермасин”, деганлар.

Иzzatulloh TURFUНОV,
Шаҳриҳон тумани ва шаҳри боши имом-хатиби



Баъзан аёлларга хос муҳим масалаларда саволлар тушади. Жумладан, идда ва унинг моҳияти ҳақида билишни истаганлар кўп.

«Идда» сўзи лугатда «санаш», «ҳисоблаш» маъноларини билдиради. Шариатда эса, эри вафот этган ёки эридан ажрашган аёл турмуш қурмай туриши лозим муддат “идда” дейилади.

Идданинг ҳикмати: биринчидан, эридан ажраган аёл ҳомиладорми-йўқми аниқданади, бу билан насл араласиб кетиши олди олиниди. Иккинчидан, ўлган эрнинг ҳурмати бажо

келирилади. Учинчидан, эр билан бирга ўтказилган



оила ҳаётининг ҳурмати юзасидан ҳам идда ўтирилади.

Англиялик олимлар бир эркак билан яшаб туриб, орада танаффус қилмай иккинчи эр билан яшай бошлаган аёлларнинг бачадонларида оғир касаллик пайдо бўлишини илмий жиҳатдан исбот қилишди.

Аллоҳ таоло марҳамат қиласи:

«**Талоқ қилинган аёллар, ўзларича уч қуруъ кутадилар. Уларга Аллоҳ уларнинг бачадонларида яратган нарсани яширишлари ҳалол эмас. Агар Аллоҳга ва охират кунига имонлари бўлса**», (Бақара, 228).

Ушбу оятда талоқ қилинган ҳайз кўрадиган аёлнинг идда муддати баён қилинган. Ояти каримадаги «қуруъ» сўзи поклик ва ҳайз маъноларини англатади. Ҳанафий мазҳабимизда унинг ҳайз маъноси олинган. Эридан ажраган хотин иддаси талоқдан сўнг уч ҳайз кўриб, учинчи ҳайзидан пок бўлиши билан тугайди.

Аллоҳ таоло аёлларнинг бачадонлари-

да яратган нарса ҳомиладир. Ажралишган мўмина-муслима аёл ҳомиладор бўлса, ҳомилам йўқ, уч марта ҳайз кўрдим, деб бошқа эрга тегиб кетмаслиги лозим.

Талоқ сурасининг олтинчи оятида бундай дейилган:

«**Аёлларингиздан ҳайздан умидсиз бўлганларининг иддалари, агар шубҳа қилсангиз, учойдир. Ҳайз қўрмаганларининг ҳам Ҳомиладорларнинг белгиланган муддати ҳомилаларини қўйишларидир**».

Ёши ўтгани туфайли ҳайз кўришдан қолган аёлларнинг талоқдан кейинги иддаси уч ой. Турли сабабларга кўра ҳайз кўрмайдиган аёл эри билан ажралишса, уч ой идда ўтиради. Ҳомиладор аёл талоқ қилинса, кўз ёриши билан иддаси чиқади.

ИДДА НИМА?

И мом Термизий келтирган ривоятда:

«Субайъа (розийаллоҳу анҳо) эрининг ўлимидан йигирма уч ёки йигирма беш кун ўтиб туғди. Сўнgra никоҳланмоқчи бўлди. Бу нарса унга инкор қилинди. Кейин Расулуллоҳга (соллаллоҳу алайҳи ва саллам) маълум қилинганида: “Агар эрга тегмоқчи бўлса, муддати келди”, дедилган.

Қуръони каримда бундай марҳамат қилинади:

«**Қаҷон мўминаларни никоҳдаб олсангиз, сўнгуларга (қўл) тегизмай туриб талоқ қилсангиз, сиз учун улар идда сақлаш мажбуриятида эмаслар**» (Азҳоб, 49).

Никоҳақдидан сўнг бирга яшамай ажралишган аёл идда ўтирмайди.

Бақара сурасининг икки юз ўттиз тўртингичи оятида бундай дейилган:

“**Сизлардан вафот этиб жуфтларини қолдирганларнинг аёллари ўзларича тўрт ой ўн кун кутарлар**”.

Эри ўлган ҳар бир аёл умр йўлдоши ҳурмати учун тўрт ой ўн кун идда ўтириши вожиб бўлади.

МАЛАВИ РЕСПУБЛИКАСИ



Жуғрофий ўрни. Малави жануби-шарқий Африкада жойлашган. Жанубда ва жануби-шарқда Мозамбик, ғарбда Замбия, шимолда Танзания билан чегарадош. Танзания ва Мозамбик билан шарқий чегараси Нияса кўли орқали ўтади.

Тарихи. Малавида қадимдан банту қабилалари яшайди. XV аср охирларида Нияса кўли атрофида Малави қабила уюшмалари пайдо бўлган. XIX асрнинг иккинчи чорагида Малави худудига


нгони, ваяо қабилалари келиб жойлашган. 1860 йиллардан оврупаликлар кела бошлиди. 1891 йили Малави Англияга қарашли “Ниясаленд протекторати” деб эълон қилинди. Мамла-

Майдони: 118 500 кв.км.
Аҳолиси: 14 миллион киши.
Пойтахти: Лилонгве шаҳри.
Тузуми: республика.
Даёвлат бошлиғи: президент.
Маъмурий тузилиши: 3 та вилоятга бўлинади.
Йирик шаҳарлари: Блантайр, Зомба, Мангочи, Балақа, Чикуава.
Пул бирлиги: малави квачаси.

кат Англиянинг бошқа мустамлакаларига ишчи етказиб берадиган ҳудудга айлантирилди. 1915 йили мустамлакачиларга қарши кўзғолон кўтарилилди. Гарчи у бостирилган бўлса-да, миллий озодлик ҳаракати давом этди. Айниқса, Иккинчи жаҳон уруши йиллари ва урушдан кейин бу ҳаракат кучайди.

1944 йили Малавида дастлабки сиёсий ташкилот – Ниясаленд Африка конгресси тузилди. У туб аҳолининг ижтимоий ҳуқуқларини кенгайтиришни ўз олдига мақсад қилиб кўйди. 1959 йили бу ташкилот ўрнига Малави конгресси партияси тузилди. 1961 йили мустамлакачилар ён беришга мажбур бўлди. Малавида конституция жорий қилиниб, барча ниясалендликларга сайлов ҳуқуки берилди. 1961 йилги сайловда қонун чиқарувчи кенгашдаги кўпчилик ўринни Малави конгресси партияси олди.

1964 йил 6 июлдан Ниясаленд мустақилликни қўлга киритиб, “Малави” деб атала бошланди. 1966 йили






Малави Республикаси эълон қилинди. 1971 йилдан 1994 йилгача мамлакатдаги бирдан-бир сиёсий партия – Малави конгресси партиясининг раиси Хастингс Камузу Банда президент лавозимини эгаллаб турди. 1994 йил 17 майда мамлакат тарихида биринчи марта кўп партиялийк асосда президент ва парламент сайлови ўтказилди. Бирлашган демократик фронт партиясининг раиси Бакили Мулузи президент лавозимига сайланди.

Малави 1964 йилдан Бирлашган Миллатлар Ташкилоти аъзоси.

Иқтисоди. Иқтисодиётнинг негизи қишлоқ хўжалиги бўлиб, маҳсулотларининг саксон беш фоизини майда дехқон хўжаликлари етиширади. Чой, тамаки, ерёнғоқ, шакарқамиш, пахта, каучук, ички эҳтиёж учун маккажўхори, оқ жўхори, тариқ, шоли, картошка эки-


тўқимачилик, пахта тозалаш, тикив фабрикалари, ҳунармандлик устахоналари бор. Ўрмон хўжалигида курилишбоп ёғоч тайёрланади. Улови унчалик ривожланмаган. Темир йўлининг узунлиги 789 км., автомобил йўллари узунлиги 11,4 минг км., шундан 2,8 минг км. асфалтланган. Лионгве ва Чилена шаҳарларида ҳалқаро аэропортлар бор. Четга тамаки, чой, шакар, қимматбаҳо ёғоч, ерёнғоқ, жун, тери, пахта сотади. Четдан озиқ-овқат, қора ва рангли металл, нефт маҳсулотлари, газлама сотиб олади. Ташқи савдода асосан Буюк Британия, Жану-



Мусулмонлар йигирма фоизни ташкил этади. Улар асосан мамлакат жанубида истиқомат қиласи. Маҳаллий анъанавий динларга эътиқод қилувчилар ҳам анчагина.

Ислом дини Малавига бундан тўрт юз йил олдин мусулмон савдогарлари билан кириб келган. Бироқ замонавий уйғониш даври ўтган асрнинг етмишинчи йилларида бошланди. Кения ва Суданда ўқиган талабалар Ислом бўйича кенг қарорвли билим олиб қайтди. Айни шу вақтларда Африка мусулмонлари ташкилотига асос солинди. Ушбу ташкилот кўмагида бир қанча исломий ўқув юртлари очилди. 1989 йилга бориб мамлакатдаги масжидлар сони олти юзтага етди.

Орифжон МАДВАЛИЕВ
таиёллади



бий Африка Республикаси, Япония, Германия, Зимбабве, АҚШ билан шериклик қиласи.

Аҳолиси. Аҳолисининг асосий қисми банту ҳалқларининг шарқий гурухига мансуб. Малави, макуа, ломве, ваяо, суахили ва бошқа элатлар яшайди. Давлат тили – чичева (малави) ва инглиз тили. Аҳолининг тўқизғоизини шаҳарликлар ташкил этади.

Дини. Аҳолисининг эллик беш фоизи насронийликнинг протестант мазҳабига мансуб, йигирма фоизи католиклар



лади. Чорвачилиги суст ривожланган. Қорамол, қўй, эчки ва бошқа ҳайвонлар боқиласи. Кўл ва дарёларда балиқ овланди.

Саноатда асосан қишлоқ хўжалиги хомашёлари қайта ишланади. Цемент, қанд заводлари, тамаки,





ФАТВО БЕРИШ МАСЬУЛИЯТИ

Фатво саволга жавоб берши маъносини англатади. Истилоҳда эса, киши саволига шаръий далил асосида жавоб бериш маъносида ишлатилади.

Шариатда мусулмонлар ҳаётида пайдо бўладиган саволларга фатво бериш фарзи кифоя ҳисобланади.

Хозирда кўпгина мусулмон мамлакатларда расмий фатво берувчи муфтий ёки халқаро марказлар бор.

Фатво беришнинг ўзига хос шартлари мавжуд. Мўътабар манбаларда кайд этилишича, араб тили, Куръон ва ҳадис илмлари, фикҳ ва Ислом тарихини чуқур ва мукаммал биладиган ва яна бошқа зарур сифатларга эга бўлган шахсларгина фатво бериш ҳуқуқига эга.

Шубҳасиз, Исломда фатвонинг ўрни ва таъсири муҳим бўлиши билан бирга ўта масъулиятли вазифа ҳам ҳисобланади.

Имом Шотибий (раҳматуллоҳи алайх) фатво бериш масъулияти ҳақида тўхталиб, қўидагиларни таъкидлайди: “Муфтий – ҳукмларни етказишда Расулуллоҳга (соллаллоҳу алайҳи ва саллам) ўринбосар ва У зотнинг меросхўри ҳисобланади. Шу боис у – Расулуллоҳ (соллаллоҳу алайҳи ва саллам) номларидан гапиради”.

Расулуллоҳ (соллаллоҳу алайҳи ва саллам) бу борада огоҳ ва эътиборли бўлишга

чақириб: “Фатвога журъатли бўлғанларингиз дўзахга журъатли бўлғанингиздир”, деганлар. Яъни, воқеъликни тўлик ўрганмай, етарли билим ва тажриба орттирамай туриб, кўрқмасдан, журъат билан фатво беришдан қайтарганлар. Буни чуқур англаб етган мусулмонларнинг дастлабки авлодлари ўзларидан илмли шахс бўлган жой-

сўралганида: “Жавоб берувчи ўзини аввал дўзахга солиб кўрсин, халос бўлишига кўзи етса, жавоб берсин”, деган эканлар.

Шайх Рамазон Бутий айтади: “Ҳукм чиқарии илми тиббиёт илми кабидир. Мабодо бирорвнинг фарзанди оғир касалга чалиниб қолса, у тегишили ташхис қўйши ва фарзандини даволаш учун тиббиётга оид




да сукут сақлашган. Имом Нававий (раҳматуллоҳи алайх) ўзларининг “ал-Мажмуъ” номли китобида Абдураҳмон ибн Аби Лайлодан қуйидагиларни ривоят қиласди: “Расулуллоҳ нинг (соллаллоҳу алайҳи ва саллам) 120 саҳобаларидан савол сўралганда, “анавидан сўранг”, деб бошқаларига ишора қилишар ва охри айланиб биринчи кишига савол қайта берилганини кўрдим”.

Имом Моликдан (раҳматуллоҳи алайх) элликта масала сўраганида, биттасига ҳам жавоб бермаган эканлар. Бунинг сабаби

китобларни титадими ёки малакали шифокорнинг олдига борадими? Тўғрисини айтганда, унинг эси жойида бўлса, кейинги йўлни тутади. Динда ҳам худди шундай. Аслида у тиббиётдан ҳам муҳимроқ, шунингдек, қамрови жиҳатидан хавфлироқдир”.

Бугунги кунда баъзи бир эътироф этилмаган шахслар ёки маълум мақсадларга йўналтирилган тузилмалар томонидан қўштириноқ ичидаги фатволар инсонларни Ислом маърифатидан узоклаштиришга сабаб бўлмоқда. Айниқса, уларнинг “жиҳод”, “байъат”,





“такфир”, “бемазҳаблик”, “хижрат” каби масалалардаги асоссиз “фатволари” ноҳақ қон тўкилишига олиб бормоқда ва инсонларнинг кафолатланган хуқуқларига раҳна солишига сабаб бўлмоқда. Имом Моликнинг (раҳматуллоҳи алайх) устозлари бўлган Робиа ибн Абдураҳмонни йиғлаган ҳолда кўриб, ундан бунинг сабабини сўрашганида, у *кишилар диний-хуқуқий саволларни билими бўлмаган шахслардан сўрашаётганини кўрганлиги*, бу ҳолат *Исломда катта хатар пайдо бўлганинидан дарак беринини таъкидлаган экан*.

Демак, чуқур илм, тажриба ва холислик каби фазилат бўлмай туриб, фатво беришнинг оқибати хайрли эмас. Шундай экан, баъзи доира ёки гуруҳларнинг Исломда улкан масала сифатида қаралган хукмларга эътиборсиз ва масъулиятсизлик билан фатво беришлари ўзлари ва ўзгаларни хам адаштиришдир.

Хулоса қилиб айтганда, илм ва салоҳиятсиз фатво бериш ёки учраган кишидан фатво сўраш ва унга эргашиб кетавериш адашувга олиб боради. Бу каби салбий оқибатларни келтириб чиқарувчи ихтилофларнинг олдини олиш биринчи навбатда уламоларнинг, қолаверса, барчамизнинг муҳим вазифаларимиздан хисобланади.

Нозим ИМИНЖОНОВ,
Тошкент Ислом
институти талабаси

Алишер Навоий

ҚАНОАТ БОЙЛИКДИР

Қаноат – бир чашмадир, олган билан унинг суви қуrimайди; у бир ҳазинаидир, ундаги бойлик сочилган билан камаймайди; у бир экинзор, уруги иззат ва шавкат ҳосилини беради; у бир дараҳтдир, унда қарам бўлмаслик ва ҳурмат меваси бор.

Қаноат – киши кўнглига равшанлик етказди; кўз ундан ёруғлик касб этади. Қаноатли дарвешнинг қаттиқ нони тамагир шоҳнинг ноз-неъмат тўла дастурхонидан яхшироқдир. Қаноатга одатланган фақирнинг ёвғон умочи – олғир бойнинг новвоту ҳолvasидан тотлироқдир.

Шоҳулдур – олмайди-ю, беради, гадо улдур – сочмайди-ю, теради. Ҳар ким қаноатга одатланган бўлса, шоҳлик-гадолик ташвишини билмайди. Гарчи тирикчилик уйи доим тор, бу ҳақда қанча муболага қилсанг, ўрни бор. Қаноат бир қўргон, унга кирсанг, нафсинг ғалвасидан қутуласан. Қаноат бир чўққи, унга чиқсанг, дўст-душманга муҳтожлиқдан холос бўласан. Қаноат ҳокисорликдир, натижаси юксаклик, у – муҳтожлик, фойдаси эҳтиёжсизлик. Қаноат экинтир, уруги – бойлик; дараҳтдир, меваси – муҳтожсизлик; йўлдир, (йўлчилиги) қаттиқ, лекин борар манзили севинтирувчиидир.


Қаноатда қанча роҳат ва фарогат бўлса, унинг акси тамада шунча разиллик ва уқубат бор.

Хасис табиатли одамнинг дўсти тиламчи ва нокасдир; разолат уларнинг феъл-авторига мосдир. Улар муносабатига камситиш ва енгилтаклик хосдир. Ҳар кимда бу сифатлар мавжуд бўлса, бундай одамни халқ ёмон кўради. Ана шу туфайли нокаслик, разиллик ривожланади, одамгарчиллик ва инсонийлик эса завол топади. Булар ор-номус уйини куйдирувчи бир ўтдир; иззат-хурмат хирмонини совурувчи ва улуғворлик шамини ўчирувчи бир елдир. Тамагирнинг бирор нима олишга ўчлиги худди еб-тўймаснинг таомга очкўзлигига ўхшайди. У бири тубанлар ҳаракати бўлса, бири ҳайвонлар одатидир.

Қаноат шундай бир жавҳарки, элни тамагирлик ва нокаслик балосидан холос қиласди ва халқни бундай оғатдан қутқаради. Тамагирлик ва нокаслик гўё икки ёқимсиз эгизаклар: униси бундан ёмон, буниси ундан ёмон – иккаласи ҳамма ёмондан ёмон.

“Маҳбубул қулуб” асаридан





Хозирги Россия худудларига Ислом дини дастлаб Ислом оламининг четида жойлашган, кейинчалик халифалик таркибига киритилган Догистоннинг Дарбанд шаҳри орқали кириб келган. Дарбандни араблар “Бобул аввоб” – “эшиклар эшиги” дея аташарди.

ДАРБАНДДАГИ “ЖУМА” МАСЖИДИ

Айнан шу эшиклар орқали ҳижрий 20 (милодий 642) иили мусулмонлар маҳаллий аҳолини Исломга тарғиб қилиш учун келган. Шу сабаб Дарбанд шаҳри Доғистон учун тарихий аҳамиятга эга. Айнан шу шаҳарда биринчи жоме масжид, иқтисодий-маданий-ижтимоий масалалар бўйича марказлар очилди.

Тўққизинч асрга келиб шаҳарнинг асосий аҳолисини араблар ташкил қиласарди. Лашкарбоши Абу Муслим аҳоли Исломни қабул қилгач, йигирма минг аскарни шаҳарга жойлаштирган.

Араб тарихчиси ва ёзувчisi Абу Ҳомид Мухаммад ибн Абдурраҳим Андалусий ёзишича, ўнинчи аср охири, ўн биринчи аср бошига келиб Дарбанд кўпмиллатли шаҳарга айланниб улгурган. Бу ерда араблардан ташқари форслар, турклар, лазгинлар, аварлар, лаклар, даргинлар, осетинлар истиқомат қиласарди.

733 йилга келиб шаҳарда еттита масжид қурилди. Халифа Ҳорун ар-Рашид ва ширвоншоҳ Иброҳим даврига келиб масжидлар қурилиши

кўпайди. 1796 йилги маълумотда масжидлар сони ўн бешта деб кўрсатилади. Аммо айнан шаҳарда илк “Жума” масжиди Ислом динини Россия худудига тарқалишига катта ҳисса кўшди.

Масжид эски шаҳарнинг марказида, мадраса, имомлар учун мўлжалланган уйлар ёнида жойлашган. Унинг қурилиши 733–734 йилларга бориб тақалади. Ўша даврда масжид шаҳардаги энг катта иморат ҳисобланарди. Кўпийиллик тарихга эга масжид бир неча бор қайта таъмирланди. Масжидга киришда тарихий ёзувга кўзингиз тушади. Унда озарбайжонлик Тожиддин кучли зилзиладан кейин уни қайта барпо қилгани ёзилган.

Масжид қошидаги мадраса қурилиши 1474 иили бошланди. Лекин 1815 йилга келиб тўлиқ битирилди ва ҳозирги кўринишни олди.

Масжид ўз бошидан қийинчилик давларни ҳам кечирди. Мамлакатга ёпирилган худосизлик балоси сабаб 1930 йили ёпилди. 1938–1943

йиллар орасида қамоқхонага айлантирилди. Фақат Иккинчи жаҳон урушининг учинчи ийлига келиб Москвадан келган буйруқ орқали мусулмонлар ихтиёрига қайтариб берилди. Ўша даврда яшаган мўйсафидлар айтишича, масжидни қамоқхона ҳолатидан чиқариш, турли ифлосликлардан тозалаш учун кўп меҳнат қилишган.

Собиқ Иттифоқ замонида “Жума” масжид шимолий Кавказдаги энг йирик масжид саналарди. Ҳозир ҳам тарихий масжидга жума кунлари туманлардан намозхонлар ошикишади.

Қадимийлигига қарамасдан, масжид яхши сақланган. Яқинда у ЮНЕСКОнинг маданий ёдгорликлар рўйхатига киритилди.

Ориф МАДВАЛИЕВ





ШОАБДУМАЛИК ОТА МАЖМУАСИ

Кейинги ўн йилда Тошкент вилоятида ўндан ортиқ тарихий-мөйморий ёдгорлик, муборак қадамжо қайта тикланди, таъмирдан чиқарилди. Шулардан бири Оҳангарон туманидаги Шоабдумалик ота (халқ орасида “Шодмалик ота” номи билан машҳур) зиёратгоҳидир. Икки йилдан бўён бу қадимий мөйморлик ёдгорлигини қайта тиклаш ишлари олиб бориляпти. Хўш, Шоабдумалик ота ким бўлган?

Манбаларда тўлиқ номи Малик Абдуллоҳ ибн Аҳмад ибн Қулмуҳаммад ибн Қодир ибн Қорахоний ал-Илоқий деб келтирилган Шоабдумалик ота ўн иккинчи аср охири, ўн учинчи аср бошларида яшаб ўтган, 1203 йили вафот этган. У Бухорода таҳсил олди, Ислом дини асослари, тасаввуф илмини чуқур ўрганди, бир неча тилларни ўзлаштириди. Кейин Юсуф Ҳамадоний тариқати сулукини юритди. Турк ва форс тилларида асалар ёзди. Мадрасаларда мантиқдан дарс берди, маъданшуносликдан яхши хабардор эди.

Ўтган асрнинг ўттизинчи йилларида таниқли рус қадимшунос олими Михаил Массон Шоабдумалик ота мажмуаси ва унинг атрофидағи ҳудудни тадқиқ қилиб, бу ерда қадимий иншоотлар изини топди. Ўтмишда айнан шу ерда карвонсарой, мадраса, масжид бўлганини аниқлади. Буюк ипак йўли (ҳозирги Тошкент – Оҳангарон катта йўли) ёқасида жойлашган Шоабдумалик ота мажмуаси Тошкент воҳасининг иирик илмий-маънавий маркази сифатида катта тарихий аҳамиятга эга.

Ўтган асрнинг машъум ўттизинчи йилларида Шоабдумалик отанинг бой ва ноёб кутубхонаси изсиз йўқолган. Қишлоқ қариялари ҳикоясига кўра, араб ёзувидағи ҳар қандай китоб сувга оқизилиб, ўтга



ёқилаётган даврда мелиса кийимидағи бир киши нодир китобларни асраб қоламан деб аравада Тўйтепа томонга олиб чиқиб кетган экан. Унинг кимлиги ҳанузгача маълум эмас. Китобларнинг кейинги қисмати – қаерга яширилгани, нима бўлгани ҳамон тадқиқотчиларга тинчлик бермаётир. Уларни қидириб жуда кўп қишлоқлар кезиб чиқилди, лекин изи топилмади. Улуғ валийнинг нодир китоблари ҳақидаги янги маълумотлар топилишидан умидвормиз.

Шоабдумалик ота мажмуаси ўрта асрлар мөйморий ёдгорлиги сифатида давлат рўйхатига олинди. Ҳозир бу ерда ҳашар йўли билан таъмирлаш ишлари олиб бориляпти, мақбарага борувчи йўлларга асфалт ётқизилди. Келажакда катта боғ барпо этиш, ҳар йили мамлакатимиз, ҳатто қўшни ўлкалардан келувчи сайёҳлар ва зиёратчилар учун қулай шароитлар яратиш режаланмоқда.

Зарифа ЭШМИРЗАЕВА,
«Олтин мерос» халқаро ҳайрия жамгармаси
Тошкент вилояти бошқаруви раиси.
Хасан БОЙМУРОДОВ



ИСЛОМ ВА ОЛАМ

Ижтимоий-иқтисодий муҳитни яхшилаш воситаси



17 май куни Ислом тараққиёт банки “Исломмомияси Башқирдистон Республикасида ижтимоий-иқтисодий соҳани ривожлантириш воситаси сифатида” номли танишув анжумани ўтказди.

Ўқув дастурларини банк ҳузуридаги Ислом тадқиқотлар институти мутахассислари олиб борди.

Россия Ислом Конференцияси Ташкилоти аъзоси бўлмаса-да, Ислом тараққиёт банки инвестиция лойиҳаларига, айниқса, мусулмон ўлкалардаги лойиҳаларга катта қизиқиш билдиримоқда.

Яхши масаввур шакллантирилиши зарур

21 май куни Лондон мусулмонлар марказида Оврупада мусулмонларга салбий

муносабат ва уни бартараф этиш муаммоларига бағишлиган анжуман бўлиб ўтди.

Ислом билан қўрқитишга



қарши курашувчи “Етар!” ташкилоти уюштирган ушбу тадбирда таниқли жамоат арбоблари, фаоллар, олимлар, соҳа синчковлари қатнашди. Йиғилганлар Буюк Британияда ва бутун дунёда мусулмонларга салбий муносабат пайдо бўлиши сабаблари ва уни бартараф этиш масалаларини мұҳокама этди.

Расман мурожсаат қилди

Бразилия Ислом Конференцияси Ташкилотига кузатувчи-давлат сифатида кириш учун расмий ариза берди. Мамлакатнинг Саудия Арабистони ва Ямандаги элчиси Сержио Луис Каниз Жидда шаҳрида ИКТ Бош котиби Акмалиддин Эҳсонўғлига Бразилия ташқи ишлар вазири Антонио Патриотнинг хатини топширди.

Бош котиб ҳозир аъзолик ҳақида янги қонун тайёрланаётгани, тасдиқлангач, Бразилия ҳукумати билан алоқалар бошланишини билдириди.

“Ал-Баваба” интернет сайти маълумотига кўра, Бразилияning ИКТга аъзо бўлиши ташкилотнинг Лотин Америкасидаги иқтисодий ва сиёсий мавқеини ошириб, фаолияти ривожланишига туртки бўлади.



Эслатиб ўтамиз, Бразилия халқаро майдонда мусулмон давлатларни, жумладан, Фаластинни қўллаб-қувватлаб келмоқда.

Шу пайтгача Лотин Америкасидаги Гайана ва Суринам давлатлари ташкилотга аъзо эди.

Катта йигилиши ўtkазилди

28-31 май кунлари АҚШнинг Лос Анже-лос шаҳрида Америка мусулмонларининг катта йиғилиши ўтди.



Араб ва мусулмонларнинг ҳозирги ҳаёти билан таништириш, Исломнинг маданий жиҳатларини кўрсатиш мақсадида ташкил этилган эди. АнжумандАҚШ ва Шимолий Америкадаги таниқли мусулмон намояндалар иштирок этди.

Ислом иқтисодига бағишинанади

Покистоннинг Қарачи шаҳри жорий йилнинг 21–22 сентябрь кунлари ислом иқтисодига бағишинланган халқаро йиғинга мезbon бўлади.

Покистон Миллий банки ва Ислом банки иши ташкилоти ҳомийлигида ўтадиган ушбу йиғилишда 250 дан ортиқ маҳаллий ва чет эллик мутахассис иштирок этиши кутилмоқда.



Ташкилот директори Солимуллоҳ айтишича, ҳозир Покистонда Исломий банк иши мамлакат банк тизими ning бор-йўғи 7 фоизини ташкил этади, бу кўрсаткич хукumat тузган дастурларга асосан келгуси уч йил ичида 12 фоизга етказилиши кутилмоқда.

Дубайда фестивал

Бирлашган Араб Амирликларида тўққизинчи ислом фестивали бўлиб ўтди.

Унда хилма-хил мусобақа ва танловлар ўтказилди. Тадбирда 350 дан ортиқ ўқувчи иштирок этиб, Қуръони каримнинг ҳифз ва қироати, ислом билимлари ва аzon бўйича куч синашди. Голибларга совғалар улашилди.



Қашшоқликка қарши йиғин

Бирлашган Миллатлар Ташкилоти Истамбулда ривожланмаган мамлакатлар йиғилишини ўтказди. Йиғилиши Туркия президенти Абдулла Гул бошқарди.

БМТ Бош котиби Пан Ги Мун очилиш маросимида гапириб, бугунги қашшоқ давлатлар “озиқ-овқат ва овқатланишга оид янги инқироз хавфи билан юзма-юз турганини” қайд этди. Тадбирда қирқ саккизта камбағал мамлакатни ривожлантиришга йўналтирилган 10 йиллик режа муҳокама қилинди. Бу давлатларда жон бошига аҳоли даромади йилига 745 АҚШ дўлларидан камдир.



Интернет маълумотлари асосида тайёрланди.



Сув Аллоҳ таолонинг инсонларга ато этган улуг неъмати. Сувсиз ер юзидағи ҳаётни тасаввур ҳам этиб бўлмайди. Кейинги пайтда жаҳон ҳамжамиятини аҳолини сув билан таъминлаш муаммоси ташвишга солаёттир. Орол денгизи қуриши билан боғлиқ экологик муаммолар бутун дунёга маълум. Лекин бу аччиқ тажриба ҳамма учун ҳам сабоқ бўлмаган кўринади. Дарёларга улкан тўғонлар қуришга бўлаётган уришилар минтақа аҳолисини ҳақли равишда ташвишлантирияпти. Бу хатти-ҳаракатлар ҳозирданоқ ҳалқлар ўртасидаги тинчлик-тотувликка рахна солмоқда.

“Халқ сўзи” газетасида (2011 йил 20 май сони) босилган ушбу долзарб мавзуга оид мақолани журналимиз ўқувчилари эътиборига ҳавола этишини лозим топдик.

РОҒУН ГЭСИ – МИНТАҚА ҲАЛҚЛАРИ КЕЛАЖАГИГА ТАҲДИД

Сўнгги пайтларда Тоҷикистон раҳбариятининг ташаббуси билан Рогунда бошлиб юборилган улкан ГЭС қурилиши ҳамда унинг келтириб чиқарииши мумкин бўлган мудҳиши оқибатлари ҳақида ботбот гапирилмоқда. Албатта, бундай маълумотлар ҳеч кимни, айниқса, шу минтақада яшаётган ҳалқларни бефарқ қолдирмайди. Битта мақолада ушбу муаммони батафсил таҳлил қилишининг эса имкони йўқ. Шу боис мен унинг айрим техник-иктисодий, қисман экологик ва ҳуқуқий жиҳатларига эътиборингизни қаратмоқчиман.


Бугунги кунда дунёда ишлаб чиқарилаётган умумий электр энергиясининг 20 фоизга яқини гидроэлектростанциялар – ГЭСлар хиссасига тўғри келади. Бу

борада энг олдинда Исландия давлати бормоқда, Норвегияда мазкур кўрсаткич 98 фоизга тенг бўлса, Канада ва Швецияда ҳам шунга яқин, Парагвайда эса тўлиқ ГЭСлар имкониятидан фойдаланилади. Таъкидлаш жоиз, Хитой дунёда электр энергиясини энг кўп истеъмол қиласидиган давлат ҳисобланади. Кейинги йилларда ушбу мамлакатда ГЭСлар қурилиши юксак суръатларда олиб борилмоқда. Бироқ бу ерда қанчалик эҳтиёж юқори бўлмасин, Тоҷикистондан фарқли ўлароқ, асосан, кичик-кичик ГЭСлар қуришга алоҳида эътибор берилмоқда. Чунки Хитой ҳалқи катта ва хавфли сув иншоотлари қуришнинг фожиавий оқибатларини ўтган асрнинг 1975 йилида бошидан кечирган. Ўшанда сув омбори тўғонининг

ўпирилиши натижасида 170 минг киши ҳалок бўлган, 11 миллиондан ортиқ аҳоли жиддий зарап кўрган эди. Шу маънода, бугун Хитойни кичик ГЭСлар мамлакати, десак ҳам бўлади. Ҳақиқатан ҳам, мазкур давлатда жаҳонда мавжуд бўлган кичик ГЭСларнинг ярмидан кўпи жойлашган.

Тоҷикистон ҳукумати томонидан қурилиши мўлжалланаётган Рогун ГЭСининг баландлиги 350 метр, ишлаб чиқариш қуввати эса 3600 МВтни ташкил этадиган тўғон дунёдаги энг йирик ҳисобланмиш ГЭСлардан ҳам сув босими ёки тўғонининг баландлиги бўйича олти баробарга, қуввати бўйича эса 144 баробарга устунроқдир. Шу ўринда айтиш керак, катта гидроиншоотларнинг атроф-муҳитга салбий таъсири ва зарари борлиги





учун Европада аллақачон улар хизматидан воз кечиш ҳакида қатъий қарорга келиб бўлинган. Шунинг учун ҳам 1998 йилдан бери мазкур қитъада улкан тўғонлардан фойдаланишдан босқичмабосқич воз кечилмоқда.


Инсон ҳеч қачон табиатни ўз измига бўйсундира олмаган. Бироқ Тожикистон расмийлари содик тузум анъаналарига содик қолиб, “Сен зўрми, мен зўр” қабилида иш туваётганликларини, сув балоси билан ўйнашаётганликларини

қисмидан пастга тушаётган ва парланаётган сувнинг музлаши оқибатида бир неча юз тонналик баҳайбат муз бўлаклари пайдо бўлиб, бутун иншоотни бузиб юбориши хавфи вужудга келди. Бундай таҳликали вазиятда Россия мутахассисларининг янги оғатнинг юз бермаслигини сўраб, Худога илтижо қилишдан бошқа иложлари қолмади.

Бугун “аср қурилиши” дея зўр берилаётган Роғун ГЭСида ҳам шундай ҳолатнинг такрорланмаслигига

биий оғат (кучли зилзила ёки қўчки) қандай оғир оқибатларга олиб келиши мумкинлиги хорижий ва маҳаллий олимлар, шунингдек, мутахассислар томонидан ҳар томонлама асослаб берилмоқда. Лекин масаланинг бошқа тарафига эътиборингизни қаратмоқчимиз. Дунё олимлари ҳозирда иқлим ўзгариши сабаб сайёрамиздаги энг йирик музликлардан бири, мазкур ГЭС курилаётган худуддан унча узоқ бўлмаган Федченко музлигининг эриши оқибатида вужудга келиши мумкин бўлган экологик вазиятни хомчўт қилиб, жiddий хавотирга тушишмоқда. Айнан шу худудда Роғун ГЭСидек улкан иншоотнинг барпо этилиши бу хавотирни ваҳимага айлантироқда. Бироқ мазкур ҳаракатлари оқибатида наинки Марказий Осиё, балки бутун дунёда экологик мувозанат издан чиқишини Тожикистон расмийлари, мутахассислари хисобга олишмаяпти.

Давлатларо дипломатияда манфаатлар мувозанати эътиборга олиниши ҳалқаро ҳукуқнинг муҳим тамойилларидан саналади. Юқоридаги муаммонинг ҳал этилишида Ўзбекистон раҳбари ва ҳукумати ҳалқаро ҳукуқ нормаларидан келиб чиқсан ҳолда, масалага дунё ҳамжамияти эътиборини қаратиб келмоқда. Юртбoshimizning бошқа мамлакатлар раҳбарлари билан олий даражадаги қандай учрашуви бўлмасин, албатта,



сезмаяптилар чоги. Аччик бўлса ҳам ҳақиқатни айтиш керак, сув балосини ҳеч нарса билан даф қилиб бўлмайди. Бунга мисол тариқасида Россиянинг Саяно-Шушенск ГЭСидаги юз берган ҳалокатни келтирайлик. Фалокат содир бўлганидан сўнг қишининг ниҳоятда қаттиқ келиши натижасида тўғоннинг юқори

ким кафолат бера олади? Тоғли худудда барпо этилиши мўлжалланаётган сунъий денгизни қишида қалин муз қатлами қопласа, қандай фалокат юз беришини ким тасаввур қила олади?

Энди масаланинг экологик жиҳатига қисман тўхталиб ўтсак. Роғун ГЭСи қурилиши ва юз бериши мумкин бўлган та-

ушбу муаммога алоҳида эътибор берилади. Президентимизнинг Россия, Хитой, Қозоғистон, Туркманистон, АҚШ, Европа Йиттифоқи ва бошқа давлат ҳамда ташкилотлар раҳбарлари билан бўлган учрашувларидағи музокаралари бунга мисолдир. Шунингдек, Юргонбосимиз 2010 йил 20 сентябрь куни БМТ Бош Ассамблеясининг Минг йиллик ривожланиш мақсадларига бағищланган олий дараҷадаги ялпи мажлисидаги нутқида ҳам трансчегаравий дарёларда сув иншоотларини қуришга мўлжалланган хар бир лойиҳа ҳалқаро холис экспертиза натижаларига асосланган ҳамда қўшни давлатлар билан келишилган ҳолда ишлаб чиқилиши ва амалга оширилиши зарурлигини таъкидлаган эдилар. Шунингдек, Президентимизнинг улкан гидроиншоотлар ўрнига кичик ГЭС ларни қуриш ҳар томонлама самарали, арzon ва экологик жиҳатдан хавфсиз эканлиги тўғрисидаги фикрлари ҳалқаро ҳамжамият томонидан қизғин кўллаб-куватланган. Масалан, Нью-Йорк давлат университети профессори, экология муаммолари бўйича эксперт А. Коддерманнинг бу борадаги фикри қўйидагича: “Мен бугунги кунда ер юзида иқлимининг глобал ўзгариши табиий оғатлар сони ва кўлами кенгайишига сабаб бўлаётган бир пайтда инсониятнинг улкан иншоотларни барпо этиш билан

боғлиқ масалада ўз масъулиятини кескин ошириши лозим, деб хисоблайман. Бу жаҳонда энг йирик – Роғун ГЭСини қуришга интилаётган Тожикистонга ҳам тааллуқлидир. Тожикистон бу улкан иншоотни барпо этишдан воз кечиши лозим”.



Жорий йилнинг 25 марта вазирлар Маҳкамасининг қарорига асосан, Катта тўғонлар ҳалқаро комиссияси билан ҳамкорликни ташкил этиш ва унда Ўзбекистон Республикаси манфаатларини ифодалаш мақсадида Ўзбекистон катта тўғонлар миллий қўмитаси ташкил этилди. Ўзбекистон Республикаси катта тўғонлар хавфсизлигини таъминлаш соҳасидаги манфаатларини, трансчегаравий сув ресурсларидан оқилона фойдаланиш бўйича нуқтаи назарини илгари суриш, бошқа мамлакатлар тажрибасини ўрганиш, уларнинг миллий қўмиталари билан илмий, техникавий ҳамда бошқа ахборотлар алмашиш орқали тўғонлар хавфсизлигини таъминлаш тизимини такомиллаштириш, катта тўғонлар ҳалқаро комиссияси ва унинг доимий ишчи гурухлари таркиби-

га етакчи мутахассислар ва олимларни жалб этган ҳолда, уларнинг ишида иштирок этиш каби масалалар бу қўмитанинг асосий вазифалари этиб белгиланди.

Юқоридаги мисоллардан кўриниб турибди, Ўзбекистон раҳбарияти ва хукумати ушбу муаммони ҳалқаро хукуқ нормалари доирасида дунё ҳамжамияти эътиборини жалб этган ҳолда ҳал этишга ҳаракат қилмоқда.

Шу ўринда мақоламизда кўтарилган масалаларга тааллуқли қўйидаги иккى ҳалқаро Конвенция – Трансчегаравий очиқ сув оқимлари ва ҳалқаро кўлларни муҳофаза қилиш ҳамда фойдаланиш бўйича Конвенция (Хельсинки, 1992 йил 17 март) ва Ҳалқаро очиқ сув оқимларидан кемалар қатнамайдиган турда фойдаланиш ҳуқуки тўғрисидаги Конвенция (Нью-Йорк, 1997 йил 21 май) нормаларини таъкидлаб ўтиш ўринлидир. Ушбу Конвенцияларда трансчегаравий дарёлардан қандай фойдаланиш, вужудга келган муаммоларни ҳал этиш каби масалалар белгилаб қўйилган. Масалан, Нью-Йорк Конвенциясининг 6-моддаси 1-қисмида ҳалқаро сув оқимларидан адолатли ва оқилона фойдаланиш шартлари кўрсатилган бўлиб, унга кўра, ўз ҳудудидан ҳалқаро сув оқимлари ўтадиган ҳар бир давлатга гидрогеографик, иқлимий, экологик ва бошқа табиий ха-



рактерга эга омилларни, шунингдек, қўшни давлатларнинг сувга бўлган ижтимоий-иқтисодий эҳтиёжини, трансчегаравий сув оқимларининг бир давлат томонидан монополаштирилиши ёки хўжасизларча ишлатилиши оқибатида бошқа бир давлат кўрадиган заарар ва шунга ўхшаш бошқа омилларни ҳисобга олиб бориши белгилаб беради.

Тожикистон раҳбарияти эса юкорида қайд этилган Конвенцияларни имзоламаганигини рўйач қилиб, умумэътироф этилган халқаро хуқуқ нормаларига зид равишда “иқтисодий ўсишга” қаратилган режаларини ўжарлик билан ҳимоя қилишдан нарига ўтмаяпти. Албатта, халқаро Конвенцияларни имзолаш ёки имзоламаслик – ҳар бир давлатнинг суврен ҳуқуқи. Лекин, кези келганда, ўз манфаатлари йўлида халқаро хукуқ нормаларини ҳар хил баҳоналар билан тан олмаслик ҳам адолатдан эмас. Тожикистон хукуматининг бу иши ўзи ўтирган шохга ўзи болта ураётган одамнинг аҳволига ўхшайди...

Фаровон ҳаётни, порлоқ келажакни таъминлаш баҳонасида ўз бурчларидан юз ўгириш ёки уни бажаришдан бўйин товлаш кечириб бўлмас хатодир.

**Икромjon
МАРДОНОВ,**

Ўзбекистон

ҳакамлик судлари
ассоциацияси Тошкент шаҳар
филиали бошиги

Асқад МУХТОР

“Кейинги вақтда – кексалик, ҳасталик сабаб жуда кам уйқу бўлиб қолдим. Уйқу қочганда боши-кети йўқ, узиқ-юлуқ ўй-хаёл қалашиб кела-вераркан. Шунда тунчироқ остида турган дафтарга баъзи масодиифий фикрларни ёзиб қўядиган бўлдим...”, дейди Асқад Мухтор “Уйқу қочганда” китобида. Сизга мана шу қайдлардан қатралар ҳавола этяпмиз.

ТУНДАЛИКЛАР

* Китоб – бойлик. Лекин сотиб олингани эмас, ўқилгани.

* Тошнинг бардоши зўр.

* Кичкина бир яхшилик қилиш учун ҳам одам (балки буюк одам) бўлиши керак; катта ёмонлик қилишга кичик одам ҳам қодир.

* Бахт бойликда десангиз, ҳамма бахтсиз. Чунки ақллига кўп нарса керак эмас, аҳмоқ эса барибир тўймайди.

* Бойликни бойлик қилган – ўзимиз. Агар унга бунчалик сифинмасак, у бир тийинга арзимас эди.

* Бой бўлиш учун кўп нарсани курбон қилиш керак: ҳаловат, саломатлик, гоҳо балки виждонни ҳам... Йўқ, меним бунга қурбим келмайди, мен унчалик бадавлат эмасман.

* Мехнатни роҳатга айлантиришни хаёл қилар эдик, роҳат меҳнатга айланди.

* Кимнингдир ёзганига офарин, кимнингдир ёзмагани учун раҳмат.

* Ёлғон ўзи унча хавфли эмас, унинг ҳақиқатга ўхшаб кетиши хавфли.

* Одамлар сени билмаса ҳам, сен одамларни бил.

* Қариликдан қўрқма, унга хали етиш керак.

* “Вақт ўтапти!” деймиз сал ҳазинлик билан. Бу гапни инсон ўзини овутиш учун ўйлаб топган. Аслида биз ўзимиз ўтапмиз...

* Вақт ўтиши билан бирор акллироқ бўлади, бирор – каттароқ.

* Мўжиза – сир – билим – ҳақиқат. Булар шу тартибда бир-бирини инкор қиласди ва бир-бirisiz яшаёлмайди.



Умид тарк этмасин дилни

МИРЗА ҚАЙНАРОВ

* * *

Хоҳ сайҳон, хоҳ бўстон бўлса – жаннатдир Ватан,
Роҳати дил, роҳати жон, оби раҳматдир Ватан.

Ким агар бир туп ниҳол ўтқазса, ул юртин севар,
Юргида нимжонга ҳам баҳшида қудратдир Ватан.

То ҳануз Бобур ила Машраб чекар оху фифон,
Холмуҳаммад ўғли Зокиржонга фурқатдир Ватан.

Холико, невчун набийлар сиғмади ўз юртига?
Икки олам сарварига шаҳри ҳижратдир Ватан.

Гоҳида дўстлар мурувват кўрсатиб сўнг мақтанар,
Кўргузар бехад мурувват, лек беминнатдир Ватан.

Сиғмагай таърифу тавсифга Ватан тимсоллари,
Содда бир кимса демишким, дилда ҳайратдир Ватан.

Дейдилар, ҳикмат билан яралмиш авлоди башар,
Мирза, билгилки, муқаррар ганжи ҳикматдир Ватан.

* * *

Кел, эй кўнгил, чу ишқ водийсида кезмакни одат қил,
Мухаббат роҳининг ғам, ранжу озорига тоқат қил.

Мурувват кўрмасанг гоҳ кимсадан ҳеч бўлмагил ғамнок,
Афу айла, мурувват билмаганга сен мурувват қил.

Бу оламда савоб иш қилмаган ороми жон топмас,
Юкин ол ота-онанг кифтидан, ҳайринг-ла роҳат қил.

Эшиитмак истаса аҳлинг латиф, ибратли бир қисса,
Гўзал Юсуф-Зулайҳо қиссасин сўйла, ҳикоят қил.

Карам айлар чоги Аллоҳ демас яхши-ёмондир бу,
Дема яхши-ёмон, бирдай саховат қил, саховат қил.

Беайб Парвардигорсан, хом сут эмган бандадурман,
Адашсан Тўғри, Ҳақ йўлга ҳидоят қил, ҳидоят қил.

Мудом ҳар ишда Аллоҳга таваккул айла, эй Мирзо,
Кучинг борича ожиз кимсани ҳифзу химоят қил.



* * *

Фақат Ҳақнинг йўли йўлдур,
Чаманда вола булбулдур,
Самарсиз боғу роғ чўлдур,
Олов хосиласи кулдур.

Бирор чекмасин озоринг,
Қаторда бўлсин-ей норинг,
Тўқис бўлсин номус-оринг,
Либосинг бўлса ҳам жулдур.

Изидан қайтмагай арслон,
Сўзидан қайтмагай ўғлон,
Ғанимга сир десанг – ёмон,
Ёгийни енг, дўстни кулдир.

Бирор меҳнат ила машхур,
Бирор фосид ила манфур,
Бирор – анвар таратгай нур,
Бирор ўз нафсига қулдур.

Қаноат айла борига,
Ярагин Ватан корига,
Карам айла ночорига,
Ичингда душманинг ўлдур.¹

Биҳиштда гул теролмассан,
Ажалга чап беролмассан,
Мудом кўксинг керолмассан,
Бир кам дунё, демак, шулдур.

Кел, эй сен Мирза, бўл бардам,
Дилинг пок айлагин ҳардам,
Имонинг сақла мустаҳкам,
Мақоми тоза кўнгулдур.

¹Шавкат Раҳмондан.



Mехри булоқ эди...

Очунда тоқ эди бизнинг отамиз,
Дилда япроқ эди бизнинг отамиз,
Мехригиё эди бизнинг отамиз,
Куръон сабоқ эди бизнинг отамиз,
Халим-юмшоқ эди бизнинг отамиз...

Не иш қиласа, холис, беминнат қилган,
Бечораҳол мискинларга уй қурган,
Йўксилларни қовуштирган – тўй қилган,
Мехри булоқ эди бизнинг отамиз,
Ғамхўр нигоҳ эди бизнинг отамиз.

Афсус, ўтган қанча нодир инсонлар,
Оқил, одил, мўмин-қобил инсонлар,
Қани энди, ўша, комил инсонлар?
Чашма-булоқ эди бизнинг отамиз,
Дасти қадоқ эди бизнинг отамиз...

Яхшига дод-ёмонлик барбод ундан,
Шодмон биби рухи мангуш шод ундан...
Ётган бўлса биҳишт ҳам обод ундан...
Халим-юмшоқ эди бизнинг отамиз,
Қалби уйғоқ эди бизнинг отамиз...

Инсоф-диёнатда барчага ўрнак,
Бурчга садоқатда ҳаммага ўрнак,
Имон-эътиқодда барчага ўрнак...
Қалби қайноқ эди бизнинг отамиз,
Лафзи қаймоқ эди бизнинг отамиз...

Эзгуликка хизмат қилиб толмаган,
Умр бўйи савоб ишдан қолмаган,
Мехнатига мукофот-ҳақ олмаган,
Толмас бармоқ эди бизнинг отамиз,
Дасти қадоқ эди бизнинг отамиз...

Халим-юмшоқ эди бизнинг отамиз,
Очунда тоқ эди бизнинг отамиз...

Ўқтам ЙЎЛДОШ,
Халқ таълими фахрийси
Андижон вилояти Асака тумани



МОМОЛАРИМИЗ АЙТАДИ...

Оч юрсанг ҳам тинч юр.

* * *

Оч бўридан тўқ бўри ёмон.

* * *

Кариганда қилга қоқиласан.

* * *

Туя сўйган эчки сўйгандан эт сўрабди.

* * *

Ёшлиқда йиллар узун, кунлар қисқа бўлади.
Карилликда йиллар қисқа, кунлар узун бўлади.

* * *

Ёши етмай, иши битмас.

* * *

Зимистон кўрмаган булбул гулистон қадрини билмас.

* * *

Ўринсиз ғазаб – ўзингга азоб.

* * *

Бошидан ўтмаганинг қошидан ўтма.

* * *

Яхшилик тўрга элтар, ёмонлик гўрга.

* * *

Кулунлаган биядан қудукдаги сув ортмас.

* * *

Тойига минсанг, бияси “белим” дейди.

* * *

Эшак билан бир турса, бедов тулпор ўтламас.

* * *

Оз-оздан кўпаяди, кўп-кўпдан йўқолади.

* * *

Ёмоннинг ақли йиртиқ,
Бир қилиғи ҳаммадан ортиқ.

* * *

Ёшлиқда қилинган иш қариганда эгасини кутиб олади.

*Китоб тумани Санам қишлоғилик
Саид аядан ёзил олинди.*



ЮРАК ҚЎРИ БИЛАН

*Ўзбекистон мусулмонлари идорасининг
Қорақалпоғистон Республикаси вакиллиги фаолиятидан*

Бундан йигирма йил илгари Қорақалпоғистонда атиги учтагина масжид бўлиб, улардаги шароит ҳам яхши эмасди. Бугун бу ерда элликта жомеъ масжид, Мухаммад ибн Аҳмад ал-Беруний номидаги Ислом ўрта маҳсус билим юрти бор. Тошкент Ислом институтини битирган қорақалпоғистонлик ёшлар сафи қирққа яқинлаб қолди.

Мустақилликнинг ilk йиллариданоқ ҳажга борувчиларга кенг йўл очилди. Аммо қорақалпоғистонлик ҳожилар кўп эмас эди. Кейинги йилларда ҳажга бориши истагини билдирганлар, шунга қурби-куввати етадиганлар сони кўпайди. Ўтган ҳаж мавсумида юз кишига бу кутлув ибодатни адо этиш насиб қилган бўлса, бу йил яна юздан ортиқ кишидан ариза тушди.

Қорақалпоғистонда зиёратгоҳлар кўп. Истиқлолгача уларнинг аксарияти нураб ётарди. Миллий, диний қадриятларимизни тиклаш, ўрганиш жараёнида обод бўлди. Нукус туманида “Шайх Оллоберган Азиз” мақбараси тикланиб, атрофи боғ қилинди. Кегейлида “Шиблий Ошиқ”, Амударёда “Шайх Жалил”, Кўнғиротда “Ҳаким Сулаймон Боқирғоний” зиёратгоҳлари қайта таъмирланди.

Одамларнинг шарт-шароити, муҳити, дунёқарashi, билишни истаган нарсаси ҳар ерда ҳар хил бўлиши табиий. Қорақалпоғистон катта жой. Бу ерда турли миллат вакиллари яшайди. Шунинг учун бу худудларда имом-хатиб бўлиш бошқа жойларга қараганда кўпроқ масъулият талаб этади. Элимиз шариат аҳкомларига оғишмай амал қилиши учун чиқариладиган фатволарга, аввало, имом-хатиблар амал қилиши зарур. Бидъат ва хурофотларга чек кўйишининг муҳим омили ҳам шунда. Қорақалпоғистонда ҳам бу борада бир қанча ишлар амалга оширилмоқда. Ўқув юртларини битириб қайтган ёшларни олдин имом-хатиб эмас, унинг ноиби сифатида ишга тайинланади. Улар тажрибали домлалардан одамлар билан муомала қилиш, халқ ичига кириш маданиятини ўрганади.

Кишилар фарз ибодатларини бекаму кўст бажаришга интилар экан, имон, намоз, рўза, закот, ҳаж ҳақида туғилган саволларига аниқ, тўғри жавоб кутади. Ҳар бир туманда аҳоли ўша ернинг шароитидан келиб чиқиб бериладиган саволлар бор. Масалан, чегарага яқин яшовчиларнинг қўшни давлатдаги қардошлари билан борди-кечилари кўп бўлгани боис, уларнинг юриш-ту-

риши, урф-одатларини ўзлариники билан солишириб, қай бири тўғрилиги ҳақида имом-хатибининг фикрини билишга қизиқади. Албатта, бу каби саволларга Ислом нуқтаи назаридан, ояллар ва ҳадисларга, мазҳабимиз йўлйўриклигига таяниб жавоб берилади.

Уч-тўрт йиллар бурун Қорақалпоғистонда миссионерлар анча ғимирлаб қолишган эди. Бу худудга мўрмалаҳдек ёпирилган миссионерлар кам таъминланган оиласаларга турли моддий ёрдамлар кўрсатиш баҳонасида кишиларни ўзларига оғдиришга уринишиди.

Бугун бемалол айта оламиз, уларнинг фаолиятига қарши анча-мунча ишлар қилинди.

Хозир одамлар уларнинг асл башараларини яхши таниб олишган. Жойларда имом-хатиблар, фаоллар иштирокида учрашувлар ташкил этилиб, халқ бузгунчи оқимларнинг ниятидан огоҳ қилинмоқда. Бу тадбирлар натижаси ўлароқ, улар фаолияти деярли барҳам топди.

Бу юртдошларимизнинг тинч-хотиржамлигимиз йўлида бир ёқадан бош чиқараётгани натижасидир. Зоро, бу йўлда ҳар бир киши юрак қўри билан ҳаракат қилиши зарур.

Муҳаммад СИДДИҚ



БИР САВОЛ СЎРАСАМ

Ўзбекистон мусулмонлари идораси раиси, муфтий Усмонхон Алимов жавоб беради

Савол: Киши қўшнисидан қарзга олган туз, нон қаби нарсаларни олганидан кўп ё кам қилиб қайтарса, гуноҳкор бўлмайдими?

Жавоб: Халқимизнинг қўшничилик муносабатлари динимиз кўрсатмалари асосида асрлар давомида шаклланган миллий қадриятларимиздан биридир. Қўшнилар орасида олди-берди бўлиб туриши табиий. Динимиз нафақат озиқовқат, балки бошқа рўзгор буюмларини ҳам қўшни сўраса, беришга буюради. Рўзгор буюмларини қўшнилар ишлатиб туришга сўрашганида қизғаниш катта гуноҳ.

Фиқҳ китобларида қўшнисидан қарзга бир дона нон олган бўлса, бир дона нон қайтариш зарур дейилган. Агар туз ёки шакарга ўхшаш нарсаларни ўлчанмай берган ё олган бўлса, бериш ё олиш вақтида ҳадя деб ният қилиш керак. Шунда қайтарилган нарса кўп ё кам бўлса-да, рибо бўлмайди.

Аммо қўшнилар бир-бирига бир пиёла тузни иккি пиёла қилиб ёки бир кило шакарни бир ярим кило қилиб қайтарасиз, деб шарт қўйишса, рибо бўлади. Бу нарса гуноҳdir.

КИТОБЛАР ТАҚДИМОТИ

Миллий матбуот марказида Имом Бухорий халқаро маркази ва Инсон ҳуқуқлари бўйича Ўзбекистон Республикаси миллий маркази ҳамкорлигига Ватанимиз мустақиллигининг 20 йиллигига бағишлиб Имом Бухорий халқаро маркази “Ўзбекистон – буюк алломалар юрти” лойиҳаси доирасида нашрга тайёрлаган китоблар тақдимоти бўлди. Тадбирда Ўзбекистон мусулмонлари идораси раиси, муфтий Усмонхон Алимов сўзга чиқиб, жумладан, бундай деди: “Азалдан диний адабиётларга чанқоқ бўлган халқимизнинг бу маънавий эҳтиёжи мустақиллик йилларида кўп минг ададли газета-журналлар, адабиётлар билан қондирила бошланди. Шу йилларда “Ислом нури” газетаси ва “Ҳидоят” журнали тимсолида юртимизда диний журналистика шаклланди. Газета ва журнал саҳифаларида асосан Ислом динининг асл моҳиятини кенг халқ оммаси онгига етказиши мақсадида Қуръони карим, ҳадиси шариф ва Имом Аъзам мазҳабига таянган ҳолда тайёрланган мақолалар чоп этилади.

Мустақиллик арафасида чиқа бошлаган ва дастлаб иккичу минг нусхада босилган “Ислом нури” газетасининг ҳозирги кунда минг-минглаб мухлислари бор. Мустабид тузум даврида “Совет шарқи мусулмонлари” деб номланган журнал эса жуда оз микдорда, асосан, хориж учун чиқарилган. Журнал мустақиллик йилларида “Ҳидоят” номи билан аталиб, йилдан-йилга унинг ўқувчилари сафи кенгайиб борди. Ҳозирги кунда у бир неча минг агад билан босилмоқда...”

Шунингдек, тақдимотда Инсон ҳуқуқлари бўйича Ўзбекистон Республикаси миллий маркази раиси Акмал Саидов, Имом Бухорий халқаро маркази раҳбари Убайдулла Уватов, Тошкент Ислом университети проректори Зоҳиджон Исломов мустақиллик йилларида халқимизга диний-маърифий меросимизни тўлақонли етказишига алоҳида эътибор қаратилаётгани, Қуръони карим маънолари ва изоҳлари таржимаси тўрт марта ўзбек тилида чоп этилгани, ушбу муқаддас китобнинг кўзи ожизлар учун брайл алифбосидаги нусхаси яратилгани, ҳадиси шариф таржималари ҳақида гапиришди.

Китоблар кўргазмасида юртимизнинг таниқли алломалари, мухаддислари ҳаёти ва уларнинг маданий-маънавий меросига оид энг сара асарлар намойиш этилди.

Мухбиримиз



Ҳомиладор, яъни, фарзанд кутаётган аёл дунёдаги энг гўзал аёл деб таърифланади. Чунки у тоза вужуди юрагининг остида асраб, улгайтиради. Қалби ҳам покиза умидларга, меҳрга тўла бўлади. Оналикка тайёргарлиги унга кўрк беради, юз-кўзига файз киритади. Атрофдагилар ҳам унинг бу вазифаси устида эҳтиром кўрсатади. Ҳаётининг бу даврини ҳар бир аёл бошқача хотирлайди. Фарзанди дунёга келгач, унга борини беришига тайёр бўлади.

БОЛАНГИЗНИ СОФИНАСИЗ...

Болажонимни бағримга қаттиқ босаман... Унинг ифори, ширин қилиқлари, беғубор кулгусини дарров соғинаман. Кун ўтгани сайин улғайиб бораётган фикру нигоҳи, бўйига бўй қўшилаётгани, мустақил бўлишга интилишини кўриб, орзуларга тўламан. Бағримни тўлдириб опичлаб юриш ҳам ғанимат. Ҳадемай катта бўлади. Тиллари бурролашади. Аста-секин подшолигидан тушади. Ухлаганида ҳам қўйиб юбормайдиган жажжи қўлчаларига узоқ термулиб, яна энтикаман... Жонимнинг бир парчасига тўймай қарайман – пишшиллабгина ухлайди. Маъсум юзига боқиб ором оламан. Ҳали гуноҳлар қорайтирган жаннатий чехрасидан кўз ололмайман. Кўзим тегмасин... Кўнглимдан дуолар отилиб чиқади: Болажоним! Бунчалар покиза яратилгансан! Аллоҳим сени йиллар оралиғидан тоза ва гуноҳсиз олиб ўтсин...

Чақалоқ туғилибона сидан киндик боғи узилади, аммо узилмайдиган кўринмас боғ ҳам бор. Мутахассислар янги туғилган чақалоқ билан онаси орасида “магнит боғи” бўлишини исботлашди. Бу илоҳий боғ тўрт йилгача она-болани руҳан боғлаб туаркан. Ана шу муҳаббат сабаб она вазифасини меҳр-муҳаббат билан, тамаъсиз адo қиласди, гўдак ҳам фақат онасиға талпинади...

Чақалоқ туғилибона кўксини излайди. Эмаётган гўдакка разм согланмисиз? Ҳеч қаерда онаси бағрида ётганидагичалик роҳат қилмайди. Она ҳам бутун ташвишларини унугиб, гўдаги билан бир олам бўлади. Кўксидан сутгина эмас, чексиз меҳр ҳам қўшилиб чиқади. Она-бала бир-биридан ўзгача тафт олади. Бу муҳаббат ва мурувватни ҳеч қайси туйғуга қиёслаб бўлмайди. Гўдак фақат оч қолганида эмас, қўрқса, касал бўлса, ўзини нотинч ва ҳузурсиз сезса ҳам она кўксидан ором топади, сокинлашади.

Туғилиш сонияларидан бошланган бу нозик туйғулар боғланиши болада илк ишонч куртакларини пайдо қиласди. Фарзанд энг бирламчи онасиға ишонади, ундан куч-кувват олади. Шунинг учун болани она сути билан боқиши, меҳр беришнинг фойдаси катта, руҳий ва жисмоний тарбияси учун жуда муҳим.

Ҳар бир бола алоҳида эътибор истайди. Унинг тилу дилини фақат онаси тушунади.

Боламнинг кўзларига қарайман... Улгайгани сари бағримдан йироқлашади. Мен эса дилбандим бир умр меҳрли бағримда бўлишини истайман...

Зебунисо ҲУСАЙН



“...ИНДАМАСАНГ, ЎЗИ КЕЛАР”

Ўзаро муносабатларда жуда самимий, тўғри бўлган онамнинг бир одатлари бор эди. Бу ҳам бўлса...

Баъзан кимнингдир ёш боласи инжиқлиқ, қайсарлик қилиб ҳеч гапга кирмай қолган пайтлар бўлади. Онаси яхшиликча йўлга солмоқчи, нимадир бериб юпатмоқчи бўлади. Бола эса ғингшиб, асабларни эговлайверади. Атрофдагилар ёрдамга келиб, онага ёпишиб олган болани ташқарига олиб чиқмоқчи, кўтармоқчи, ўйнатмоқчи бўлишади. Лекин фойдасиз. Ўз боласининг тилини тополмаган она йиғламоқдан бери бўлиб қўпчилик орасида ҳижолат чекади, тўртта одамнинг даврасига қўшилганига пушаймон ейди.

Агар шундай вазият бўлиб қолса, онам бехосдан озгина ҳайрат, озгина лоф билан бир қизиқ мавзуда гап бошлардилар. Худди “бири тоғдан, бири боғдан” дегандек. Бундан ҳайрон бўлганлар савол назари билан қарашарди. Энг қизифи, бошқаларнинг ҳайронлиги гапуқмас болага ҳам “юқиб”, овози пасайиб борар, қўпчиликни қизиқтириб қўйган гапларни у ҳам уқишга интиларди. Шунда она жоним катталарга қўз қисиб қўярдиларда, гапларини янаем завқ билан давом эттирадилар. Даврадошлар ҳам худди ўша кайфиятда сухбатга қўшилгани сайин, дикқат марказидан чиқиб қолган йиғлоқи бола гоҳ унга, гоҳ бунга қараганча тинчланаб қоларди.

— “Кел-кел деса, нози келар, индамаса, ўзи келар”, бу мақолни опоғдоданг айтиб, маъносини чақиб берганлар, – деб тушунтирганлар онам. – Баъзи болаларнинг табиати шунаقا бўлади: қанча яхши гапириб, кўнглига қарасант, эътибор берсанг, қайсарлиги шунча ортиб, ялинтиргиси келаверади. У билан ишинг бўлмай, бошқа юмушга жиддий банд бўлсанг, ўзига келиб қолади. Шунинг учун болани ҳадеб папалаб, авайлаб, айтганини қиласвериш тўғри эмас. Болаларга бепарво бўлманглар-у,

аммо бошқа иши, ташвиши йўқ одамдек кўзига термулаверманглар. Йиқилса ҳам ваҳима қилманг, сабрли, чидамли бўлишга ундан, фикрини бошқа яхши ишларга чалғитинг.

Онам, айниқса, жиянларимдан кимдир овқат пайтида аразлаб, бир чеккага бориб тумшайиб ўтириб олганда, бу мақол кучини такрор исботлардилар. Катталарга астагина “ишинг бўлмасин”, дердилар-да, таом ширин бўлганини мақтаб, ҳаммани овқатга таклиф қиласдилар. Аразчи бола секин-секин дастурхонга яқинлашиб, даврага қўшилиб кетар, бора-бора бу ёмон одатини ташларди.

Бу усулни зарур ўринларда мен ҳам кўллаб тураман. Тўғри, айрим бир кесар болалар ҳадеганда ён беравермайди. Яна баландроқ бакириб, гапни гапга қовуштирумай, ён-атрофидагиларнинг диққатини ўзига қаратиш учун чинқириб кўради, ер тепинади... Бундай пайтда катталар озгина сабр-тоқату кенг феъллик билан сухбатларини хотиржам, берилиб давом эттирсалар, онам айтганиларидек, “ҳаводаги булатлар аста-секин тарқайди...”

Аслида, баъзи масалаларда биз – катталар ҳам болаларга ўхшаймиз. Нимадандир қийналиб, озор чекиб, кайфиятимиз тушиб турганида, кимдир “Сизга раҳмим келяпти, қийналибсиз” деган маънода гапирса, хўрлигимиз ортиб, қўзёшимизни тийишга ё кучимиз етади, ё йўқ... Шундай пайтда бирор, чин дилдан: “Қўйинг-э, шунга хафа бўлиб ўтирибсизми? Сизга ярашмайди”, деса, бир қарашда қўнглилизни тушунмасликдай, бағритошлиқдай туюлади. Лекин шу қатъият бизни охири ҳайрсиз ҳис-туйгулар гирдобидан тортиб олади, вазиятга ақл кўзи билан қарашга ундида, тўғри йўлга қайтаради. Яна Аллоҳ билгувчи.

Мухтарама УЛУФ

МОЙЧЕЧАК ГУЛИ

Ибн Сино мойчечак гулида қиздирувчи ва хилтни етилтирувчи хусусият борлигини айтади. Мойчечак гули таркиби эфир мойлари, flavon гликозидлар, кумаринлар, каротин, С дармондориси, оқсил ошловчи, аччиқ ва шиллиқ моддаларга бой. Томирларнинг оғзини очади. Эритувчи ва суюлтирувчи таъсирга эга. Меъдадаги иссиқдан бўлган шишни ва қотиб қолган қонни эритади, совуқдан бўлган шишиларни йўқотади. Оқма яраларда фойда қилиб, қовжираган яраларни кўчиради, тузалиши қийин яраларни тозалайди. Мушак ва асаб жароҳатларига даводир. Янги узилган гули ҳидланса, ухлатади. Балғамни сўради, бавосирни даволайди, қовук оғриғига, талоқ қаттиқлигига шифо бўлади. Шунингдек, кўз оғриғида, кўз хиралашганида, тошмаларда, қичимада фойда қиласди. Ҳалқ табобатида мойчечак гулларидан тайёрланган доривор воситалар (қайнатма, дамлама, малҳам, шарбат, ёғ) мия, бош, тиш, қулоқ, кўз оғриқларини, ошқозон-ичак, асаб, ўпка, жигар, буйрак, шамоллаш ва бошқа касалликларни даволашда кент қўлланилади.

Маслаҳатлар:

1. Туйилган мойчечак гуллари сувда қайнатиб ичилса, мия ва асабларни мустаҳкамлаб, жинсий қувватни оширади; тер, сут, пешоб ва ҳайзни равон келтиради. Шамоллаш, нафас қисиши, сариқ касаллигига шифо бўлади.
2. Боши кўп оғрийдиган кишилар қурутиб майданган мойчечак гулини овқатдан ярим-бир соат кейин 1-2 грамдан ичишлари керак.
3. Мойчечак ёғи баданга суртилса, чарчоқва толиқишини йўқотади. Бўгин (умуртқа, бел, оёқ, қўл, бод, подагра) ва қулоқ оғриғига шифо бўлади.



Савол: Хурматли “Ҳидоят” журнали таҳририяти! Биз бир гуруҳ улфатларни “шайх” сўзи қизиқтириб қолди. Нима бу – мартабами ёки диний унвонми? Нима бўлса ҳам, уни ким, кимга, қандай хизматлари учун беради. Ўзбекистонда нечта шайх бор? Сиздан илтимос, шу сўзга тушунча берсангиз

Солижон ЮНУСОВ, Кўқон шаҳри

Жавоб: “Шайх” арабча сўз бўлиб, лугавий маъноси қариядир. Кўчма маънода бошлиқ, қабила бошлиғи, маънавий етакчи, муршид, олим, ўқитувчи, устозга нисбатан ҳам ишлатилади. *Кўплик шакли* – “шуйух”, “ашёх”, “машойих”, “машяха”.

Одатда ислом илмларини пухта эгаллаган, кўплаб шогирдлар чиқарган, илм ривожига ҳисса кўшган олимга унинг шогирдлари, ихлосмандлари ва оддий ҳалқ улуғлаб “шайх” деб мурожаат қилишган. Китобларда олимлар “шайхул ислом” (*ислом дини шайхи*), “шайхуш шуйух”, “шайхул машойих” (*шайхлар шайхи*), “шайхул маржеъ” (*саволлар бобида унга қайтиладиган шайх*) деб ҳам аталишган.

“Шайх” қайсиdir ташкилот берадиган (қози, имом-хатиб, имом ноиби, мутавалидан фарқли ўлароқ) расмий унвон ёки диний мартаба эмас. Шунинг учун ҳозирда дунёда ёхуд Ўзбекистонда фалон нафар шайх бор, дейиш ўринсиз.